

KATEKISEMA YA HEIDELBERG

GOBA

TLHAHLO THUTONG YA BOKRISTE

SONTAGA SA I

Potšišo 1: Na se e lego khomotšo ya gago fela go pheleng le go hweng ke eng?

Karabo: Khomotšo ya ka e tee ke gore ke nna wa Jesu Kriste fela. Ge ke phela le ge ke ehwa,^{a)} mmeleng le moyeng, ga ke wa ka le ga tee.^{b)} Ke wa Jesu Kriste fela, yo e lego Mophološi wa ka wa potego.^{c)} Ke Jesu wo a ntefetšego melato ya ka ka botlalo ka madi a gagwe a bohlokwa,^{d)} a mphološa pušong ya Diabolo ka moka.^{e)} Ke Jesu yo a mpolokago ka mokgwa woo^{f)} gore ntle le thato ya Tate wa magodimong, ga go moriri o tee wa hlogo ya ka wo o kgonago go wa.^{g)} Ke Jesu yo a ntlhokomelago gore dilo tšohle, tšeo di ntiragalelago di nkiše phološong.^{h)} Ka baka leo o ntshepiša bophelo bjo bo sa felegoⁱ⁾ ka Moya o Mokgethwa. Gomme o dira gore ke rate ke be ke ikemišetše go dira le go mo phelela ka pelo ya ka ka moka^{j)}.

(a) Barom. 14:8. (b) 1 Bakor. 6:19. (c) 1 Bakor. 3:23; Tit. 2:14. (d) 1 Pet. 1:18,19; 1 Joh. 1:7; 2:2,12. (e) Baheb. 2:14; 1 Joh. 3:8; Joh. 8:34-36. (f) Joh. 6:39; 10:28; 2 Bathes. 3:3; 1 Pet. 1:5. (g) Mat. 10:30; Luk. 21:18. (h) Barom. 8:28. (i) 2 Bakor. 1:22; 5:5; Baef. 1:14; Barom. 8:16. (j) Barom. 8:14; 1 Joh. 3:3.

Potšišo 2: Naa o swanetše go tseba dikarolo tše kae gore o kgone go phela ka lethabo le go hwa ka khutšo khomotšong ye?

Karabo: Ke swanetše go tseba dikarolo tše tharo:^{a)} Ya pele: Ke tsebe bogolo bja dibe tša ka le bomadimabe bja ka.^{b)} Ya bobedi: Ke tsebe gore nka phološwa bjang dibeng tša ka le bomadimabeng bja ka.^{c)} Ya boraro: Ke tsebe gore nka leboga Modimo bjang ka baka la phološa yeo.^{d)}

(a) Mat. 11:28-30; Baef. 5:8. (b) Joh. 9:41; Mat. 9:12; Barom. 3:10; 1 Joh. 1:9, 10. (c) Joh. 17:3; Dit. 4:12; 10:43. (d) Baef. 5:10; Ps. 50:14; Mat. 5:16; 1 Pet. 2:12; Barom. 6:13; 2 Tim. 2:15.

KAROLO YA PELE

TŠA BOMADIMABE BJA MOTHO

SONTAGA SA 2

Potšišo 3: Na bomadimabe bja gago o bo tseba ka eng?

Karabo: Ka molao wa Modimo (Barom. 3:20).

Potšišo 4: Modimo o re laelang ka molao wa gagwe?

Karabo: Kriste o re ruta seo ka kakaretšo ya melao ye e latelago:

Mat. 22:37-40: *Morena Modimo wa gago o mo rate ka pelo ya gago ka moka, le ka moya wa gago ka moka, le ka tshaologanyo ya gago ka moka. Ke yona taelo ya pele, yona e kgolo. Gomme ya bobedi e swana le yona, e re: o tlo rata batho ba bangwe bjalo ka ge o ithata.* (Doit. 6:5; Lev. 19:18; Mark. 12:30; Luk. 10:27).

Potšišo 5: Na o na le maatla a go phetha molao wo ka moka ka mokgwa o phethegilego naa?

Karabo: Aowa^{a)}, gobane tlhago ya ka e ntira gore ke hloye Modimo le batho ba bangwe^{b)}.

(a) Barom. 3:10,20,23; 1 Joh. 1:8,10; (b) Barom. 8:7; Baef. 2:3; Tit. 3:3; Gen. 6:5; 8:21; Jer. 17:9; Barom. 7:23.

SONTAGA SA 3

Potšišo 6: Na Modimo o hlodile motho e le e mobe le yo kgopo bjalo naa?

Karabo: Aowa, eupša o mmopile e le yo botse,^{a)} ka seswantšho sa gagwe^{b)} ke gore go lokeng le go kgethegeng ga nnete. Modimo o mmopetše gore a mo rete, a be a mo tumiše.^{c)} Gore a kgone go dira bjalo o mmopile gore a tsebe Modimo mmopi wa gagwe gabotse; a mo rate ka pelo ya gagwe ka moka, le gore a phele le yena mo boiketlong ka go sa felego.

(a) Gen. 1:31. (b) Gen. 1:26,27. (c) Baef. 4:25; Bakol. 3:10; 2 Bakor. 3:18.

Potšišo 7: Ge go le bjalo tlhago ye e šenyegilego ya motho e tšwa kae?

Karabo: E tšwa go se kweng ga batswadi ba rena ba methomo, e lego Adama le Eva paradeising,^{a)} mo tlhago ya rena e ilego ya senyega gona. Ke moka ga rena re imilwe ra tswalelwa sebeng.^{c)}

(a) Gen. 3; Barom. 5:12,18,19; (b) Ps. 51:7; Gen. 5:3.

Potšišo 8: Na re senyegile ka mokgwa wo re ka šitwago go dira botse bofe goba bofe ka maatla a rena, ra sekamela bokgopong ka moka naa?

Karabo: E, re senyegile ka mokgwa wo,^{a)} ge e se ge re ka boela ra tswalwa lefsa ka Moya o Mokgethwa.^{b)}

(a) Gen. 6:5; 8:21; Job. 14:4; 15:14,16,35; Joh. 3:6; Jes. 53:6. (b) Joh. 3:3,5; 1 Bakor. 12:3; 2 Bakor. 3:5.

SONTAGA SA 4

Potšišo 9: Na Modimo ga a šitele motho ge a neela motho molao wo a ka se kgonego go o phetha?

Karabo: Aowa,^{a)} gobane Modimo o bopile motho ka mokgwa wa gore motho a ka phetha molao woo;^{b)} eupša motho ka noši le ditlogolo tša gagwe ka moka o itimile mpho ya go ka o phetha ka go theetša Sathane,^{c)} le go tshela molao ka boomo.

(a) Baef. 4:24. (b) Gen. 3:13; 1 Tim. 2:13,14. (c) Gen. 3:6; Barom. 5:12.

Potšišo 10: Na Modimo o tla dumela go se kwe moo le bokgopo bjoo gore bo tšwelele pele bo sa otlwe naa?

Karabo: Aowa, le gannyane, eupša o galefa kudu^{a)} godimo ga sebe sa tlhago le dibe tšeo di dirwago, e bile o rata go di ahlola ka kahlolo ye e lokilego mehleng ya bjale le mehleng e se nago bofelu.^{b)} Bjalo ka ge a itše: Go rogakwe mang le mang e a sa tiišetšego go dira tšohle tše di ngwadilwego pukung ya molao.^{c)}

(a) Gen. 2:17; Barom. 5:12. (b) Ps. 50:21; 5:6; Nah. 1:2; Eks. 20:5; 34:7; Barom. 1:18; Baef. 5:6. (c) Doit. 27:26; Bagal. 3:10.

Potšišo 11: Le ge go le bjalo, na Modimo ga se wa lešoko naa?

Karabo: E, Modimo ke wa lešoko,^{a)} gape ke Modimo wa toka.^{b)} Ka baka leo toka ya gagwe ke gore sebe seo se otlwe ka kotlo e kgolo-kgolo, ke gore ye e ša felego, mmelele le moyeng, gobane dibe di kgahlanong le borena bjo bo phagamego bja Modimo.

(a) Eks. 34:6,7; 20:6. (b) Ps. 7:10; Eks. 20:5; 23:7; 34:7; Ps. 5:5,6; Nah. 1:2,3.

KAROLO YA BOBEDI

TŠA PHOLOŠO YA MOTHO

SONTAGA SA 5

Potšišo 12: Go ya ka kahlolo ye e lokilego ya Modimo, re swanelwa ke kotlo ya mehla yé le ya mehla ye e sa nago go fela. Ge go le bjalo, na ga go na tsela e nngwe yeo ka yona re ka phemago kotlo ye gape ra boela ra amogelwa kgaugelong ya Modimo naa?

Karabo: Modimo o rata gore seo toka ya gagwe e se laelago se pethwe ka botlalo.^{a)} Ka baka leo rena ka borena re swanetše go phetha seo se laelwago ke toka ya gagwe, goba re se phethelwe ke e mongwe.^{b)}

(a) Gen. 2:17; Eks. 23:7; Hesek. 18:4; Mat. 5:26; 2 Bathes. 1:6; Luk. 16:2. (b) Barom. 8:4.

Potšišo 13: Na re ka kgona go phetha seo toka ya gagwe e re laelago sona ka borena?

Karabo: Aowa, le gannyane, eupša re godiša melato ya rena letšatši ka letšatši. (Job. 9:2; 15:15,16; 4:18,19; Ps. 130:3; Mat. 6:12; 18:25; 16:26.)

Potšišo 14: Na ga go mo go ka hwetšwago sebopša seo se ka re phethelago ka botlalo seo toka ya Modimo e re laelago sona na?

Karabo: Aowa, ka mabaka a: (1) Modimo ga a rate go otlā sebopiwa se sengwe ka baka la molato wo o dirilwego ke motho.^{a)} (2) Ga go sebopiwa se sengwe seo se ka rwalago bogale bjo sa felego bja Modimo bakeng sa sebe, goba go phološa dibopiwa tše dingwe bogaleng bjoo ka go dira bjalo.^{b)}

(a) Hesek. 18:4; Gen. 3:17. (b) Nah. 1:6; Ps. 130:3.

Potšišo 15: Ge go le bjalo, na re swanetše go nyaka Mmoelanyi le mophološi wa mohuta mang?

Karabo: Re swanetše go nyaka mmolanyi le mophološi yo e lego motho wa nnete,^{a)} le e a lokilego^{b)} gape e be Modimo wa nnete,^{c)} yo a nago le maatla a go feta dibopiwa ka moka.

(a) 1 Bakor. 15:21. (b) Baheb. 7:26. (c) Jes. 7:14; 9:5; Jer. 23:6; Luk. 11:22.

⊗ SONTAGA SA 6

Potšišo 16: Na ke ka baka lang ge mmolanyi a swanetše go ba motho wa nnete le yo a lokilego?

Karabo: Ka gobane toka ya Modimo e nyaka gore tlhago ya motho ye e dirilego sebe, e swanetše go se lefela;^{a)} le gore motho yo e lego modiradibe a ka se kgone go lefela badiradibe ba bangwe.^{b)}

(a) Hesek. 18:4,20; Barom. 5:18; 1 Bakor. 15:21; Baheb. 2:14-16. (b) Baheb. 7:26,27; Ps. 49:8; 1 Pet. 3:18.

Potšišo 17: Ke ka baka lang a swanetše go ba Modimo wa nnete?

Karabo: Ke ba baka la gore ka maatla a bomodimo bja gagwe ^{a)} a o kgona go rwalela boima bja bogale bja Modimo ^{b)} mo bomothong bja gagwe.^{c)} Ka maatla a bomodimo o re thopela bophelo le toka, mme a re bušetša tšona.^{d)}

(a) Jes. 9:5; 63:3. (b) Doit. 4:24; Nah. 1:6; Ps. 130:3. (c) Jes. 53:4,11. (d) Jes. 53:5,11.

Potšišo 18: Na mmoelanyi yoo e lego Modimo wa nnete ^{a)} le motho wa nnete ^{b)} e a lokilego,^{c)} ke mang?

Karabo: Ke Morena wa rena Jesu Kriste ^{d)} yo re mo neilwego ke Modimo, go ba bohlale, toka, kgethego, le go ba phološo ya rena ye e phethegilego.^{e)}

(a) 1 Joh. 5:20; Barom. 9:5; 8:3; Bagal. 4:4; Jes. 9:6; Jer. 23:6; Mal. 3:1. (b) Luk. 1:42; 2:6,7; Barom. 1:3; 9:5; Bafil. 2:7; Baheb. 2:14,16,17; 4:15. (c) Jes. 53:9,11; Jer. 23:5; Luk. 1:35; Joh. 8:46; Baheb. 4:15; 7:26; 1 Pet. 1:19; 2:22; 3:18. (d) 1 Tim. 2:5; Mat. 1:23; 1 Tim. 3:16; Luk. 2:11; Baheb. 2:9. (e) 1 Bakor. 1:30.

Potšišo 19: Taba yeo, o e tseba ka eng?

Karabo: Ka ebangedi e kgethwa ya Modimo, yeo a thomilego go e utulla paradeiseng.^{a)} Ka morago ga moo a e kwatša ka borakgolo ba bakgethwa ^{b)} le ka baporofeta,^{c)} gape o e swantshitše ka dihlabele le ka melêtlô ya melao.^{d)} Mafelelong a phethagatša ebangedi ye ka Morwa wa gagwe e a tswetšwego a nnosi.^{e)}

(a) Gen. 3:15. (b) Gen. 22:18; 12:3; 49:10. (c) Jes. 53; 42:1-4; 43:25; 49:5, 6,22,23; Jer. 23:5,6; 31:32,33; 32:39-41; Mika 7:18-20; Ditiro 10:43; 3:22-24; Barom. 1:2; Baheb. 1:1. (d) Baheb. 10:1,7; Bakol. 2:7; Joh. 5:46. (e) Barom. 10:4; Bagal. 4:4; 3:24; Bakoš. 2:17.

SONTAGA SA 7


Potšišo 20: Na batho bohle ba tla phološwa ka Kriste, ka mokgwa wo ba rogakilwego ka Adama naa?

Karabo: Aowa,^{a)} go tla phološwa felo bohle bao ba kopantšwego mo go Jesu ka tumelo ya nnete, bao ba amogelago mešomo ya gagwe yohle ya kgaugelo.^{b)}

(a) Mat. 7:14; 22:14. (b) Mark. 16:16; Joh. 1:12; 3:16,18,36; Jes. 53:11; Ps. 2:12; Barom. 11:20; 3:22; Baheb. 4:3; 5:9; 10:39; 11:6.

Potšišo 21: Tumelo ya nnete ke eng?

Karabo: Tumelo ya nnete ke tsebo ye e tiilego le kholofelo ye e tiilego. Ke tsebo ye ka yona re ka amogelago tšohle tšeo Modimo o re utuletšego tšona Lentšung la gagwe gore ke nnete.^{a)}



(a) Jak. 2:19. (b) Baheb. 11:1,7; Barom. 4:18-21; 10:10; Baef. 3:12; Baheb. 4:16; Jak. 1:6. (c) Barom. 1:17; Bagal. 3:11; Baheb. 10:10,38; Bagal. 2:16. (d) Baef. 2:8; Barom. 3:24; 5:19; Luk. 1:77,78. (e) Bagal. 5:22; Mat. 16:17; 2 Bakor. 4:13; Joh. 6:29; Baef. 2:8; Bafil. 1:19; Dit. 16:14. (f) Barom. 1:16; 10:17; 1 Bakor. 1:21; Dit. 10:44; 16:14.

Potšišo 22: Bjale seo mokriste a swanetšego go se dumela ke eng?

Karabo: Tšohle tšeo Modimo a re tshepišago ebangeding^{a)} tšeo re di rutwago di akareditšwe ke ditemana tša tumelo ya bokriste ye e akareditšwego le ye e sa belactšego.

(a) Joh. 20:31; Mat. 28:19; Mark. 1:15.

Potšišo 23: Ditemana tšeo di reng?

Karabo:

Ke dumela go Modimo Tate yo maatla ka moka,

mohlodi wa legodimo le lefase.

Ke dumela le go Jesu Kiste Morwa wa gagwe
motswalwanoši, Morena wa rena,

yo a amogetšwego go Moya o Mokgethwa,
a belegwa ke Maria kgarebe,

a hlokofatšwa mehleng ya Pontio Pilato,
a bapolwa sefapanong, a hwa, a bolokwa,
a fologela heleng,

a tsoga bahung ka letšatši la boraro,

a rotogela legodimong,
gomme o dutše letsogong le letona la Modimo,
Tate yo maatla ka moka,

mo a tlogo boa gona go tlo ahlola ba ba phelago le ba ba hwilego.

Ke dumela le go Moya o Mokgethwa,
Le Kereke e kgethwa ya bohle, le tshwaragano
ya bakgethwa,

le tebalelo ya dibe,

le tsogo ya mmele,

le bophelo bjo bo sa felego. AMENE.

SONTAGA SA 8:

Potšišo 24: Ditemana tše di aroganywa bjang?

Karabo: Di aroganywa ka dikarolo tše tharo: Karolo ya pele e bolela ka ga Modimo Tate le tlhologo ya rena. Karolo ya bobedi e bolela ka ga Modimo Morwa le phološo ya rena. Karolo ya boraro e bolela ka ga Modimo Moya o Mokgethwa le kgethafatšo ya rena.

Potšišo 25: Ka ge go na le Modimo o tee a nnoši fela^{a)}, ke ka baka lang ge o bitša Tate, Morwa, le Moya o Mokgethwa?

Karabo: Ke gobane Modimo o iponagaditše bjalo Lentšung la gagwe^{b)} ka go re ba bararo bao ba ba aroganego, ke Modimo wa nnete a noši fela.

(a) Doit. 6:4; Baef. 4:6; Jes. 44:6; 45:5; 1 Bakor. 8:4,6. (b) Jes. 61:1; Luk. 4:18; Gen. 1:2,3; Ps. 33:6; Jes. 48:16; Mat. 3:16,17; 28:19; 1 Joh.

5:7; Jes. 6:1,3; Joh. 14:26; 15:26; 2 Bakor. 13:13; Bagal. 4:6; Baef. 2:18; Tit. 3:5,6.

MODIMO TATE LE TLHOLEGO YA RENA

SONTAGA SA 9

Potšišo 26: Naa o dumelang ge o re: *Ke dumela go Modimo Tate, yo maatla ka moka, mohlodi wa legodimo le lefase?*

Karabo: Ke dumela gore Tate e a sa felego wa Morena wa rena, Jesu Kriste, ke yena a bopilego legodimo le lefase, le tšohle tše di lego gona ka tše di sego gona.^{a)} Ke yena yo a dutšego a di boloka le go di buša^{b)} ka morero wa gagwe wa ka mehla le ka pabelelo ya gagwe. Gomme ka baka la Morwa wa gagwe Kriste, ke yena Modimo wa ka le Tate wa ka.^{c)} Ke Tate yeo ke mo holofetšego mo go hlokago pelaelo gore o tlo ntlhokomela ka tšohle tše hlokwago ke mmele le moya.^{d)} Gape le go tše mpe tše, Modimo a di dumelelago godimo ga bophelo bja ka, lefaseng le la mahlomola, o tla di fetša gore di nkhole.^{e)} O kgona go di dira gobane ke Modimo yo maatla ka moka.^{f)} Gape o rata go di fetola gobane ke Tate yo a tshepegago.^{g)}

(a) Gen. 1 le 2; Eks. 20:11; Job. 33:4,38,39; Ditiro 4:24; 14:15; Ps. 33:6; Jes. 45:7. (b) Baheb. 1:3; Ps. 104:27-30; 115:3; Mat. 10:29; Baef. 1:11. (c) Joh. 1:12; Barom. 8:15; Bagal. 4:5-7; Baef. 1:15. (d) Ps. 55:23; Mat. 6:25,26; Luk. 12:22. (e) Barom. 8:28. (f) Jes. 46:4; Barom. 10:12. (g) Mat. 6:32,33; 7:9-11.

SONTAGA SA 10

Potšišo 27: Na o kwišiša eng ka ga tlhokomelo ya Modimo?

Karabo: Ke kwišiša gore ke maatla a Modimo a a šitwego ke selo ao a lego gohle^{a)}. Ka maatla ao, Modimo o hlokomela le go buša legodimo le lefase le dibopiwa tšohle, ka mo o ka rego ke ge a di swere ka letsogo la gagwe^{b)}. Tšohle di tšwa go Modimo: dimela le bjang, pula le komelelo^{c)}, mengwaga ya khora le ya tlala, dijo le dino, phólô le malwetšiši^{d)}, lehumo le bodiidi^{e)} le tše dingwe tšohle, ga di re tlele ka sewelo, eupša di tla go rena ka letsogo la gagwe la botswadi^{f)}.

(a) Dit. 17:25-28; Jer. 23:23,24; Jes. 29:15,16; Hesek. 8:12. (b) Baheb. 1:3. (c) Jer. 5:24; Dit. 14:17. (d) Joh. 9:3. (e) Diema 22:2. (f) Mat. 10:29; Diema 16:33.

Potšišo 28: Naa re holega bjang ge re tseba gore Modimo o hloedile tšohle le gore o dutše a di boloka ka tlhokomelo ya gagwe?

Karabo: Go tseba taba ye, go re hola ka go re re kgona go bea tshepo e tiilego go Modimo le Tate yo a tshepegalago^{a)} go tšohle tšeo di ka re hlagelelo^{b)}. Ka baka leo re kgona go kgotlelela mathateng ka moka mme re kgona go leboga katlegong^{c)}. Go re hola go tseba gore ga go sebopiwa se sengwe seo se ka kgonago go re aroganya le lerato la gagwe^{d)}; ka gobane dibopiwa tšohle di matsogong a gagwe, di ka se ke tša itšhišinya le ge e le go šutha^{e)} kgahlanong le thato ya gagwe.

(a) Ps. 55:23; Barom. 5:4. (b) Barom. 5:3; Jak. 1:3; Ps. 39:10; Job. 1:21,22. (c) 1 Bathes. 5:18; Doit. 8:10. (d) Barom. 8:38,39. (e) Job. 1:12; 2:6; Diema 21:1; Dit. 17:25.

MODIMO MORWA LE PHOLOŠO YA RENA

SONTAGA SA 11

Potšišo 29: Ke ka baka lang ge Morwa wa Modimo a bitšwa Jesu, ge le fetolwa ke go re Mophološi?

Karabo: O bitšwa Jesu ke go re Mophološi ka gobane o a re phološa e bile o re lokolla dibeng tša rena tšohle^{a)}. Go feta fao ga go e mongwe o šele yo ne nyakago phološo go yena mme re e hwetša^{b)}.

(a) Mat. 1:21; Baheb. 7:25. (b) Dit. 4:12; Joh. 15:4,5; 1 Tim. 2:5; Jes. 43:11; 1 Joh. 5:11.

Potšišo 30: Na bao ba nyakago phološo ya bona le lehlogonolo go ba bakgethwa, goba go bona ka bobona, goba felo go gongwe, na go šupa gore ba dumela go Jesu Kriste yena Mophološi a noši, naa?

Karabo: Aowa, gobane ka mediro ya bona ba latola Jesu yena Mophološi a le noši, le ge ka melomo ya bona ba leka go mo tumiša^{a)}. Gobane taba ke e tee fela go tše pedi tše, yeo e lego therešo: E ka ba gore: (1) Jesu ga se Mophološi yo a phethagetšego, goba (2) bao ba amogelago Mophološi yo ka tumelo ya nnete, ba swanetše go hwetša tšohle tšeo ba di hlokago phološong ya bona go yena fela^{b)}.

(a) 1 Bakor. 1:13,30,31; Bagal. 5:4. (b) Baheb. 12:2; Jes. 9:6; Bakol. 1:19,20; 2:10; 1 Joh. 1:7.

SONTAGA SA 12

Potšišo 31: Ke ka baka lang ge a bitšwa *Kriste* ge le fetolwa ke go re Motlotšwa?

Karabo: O bitšwa *Kriste*, ke go re Motlotšwa, ka gobane o hlomamišitšwe ke Modimo Tate, e bile o tloditšwe ka Moya o Mokgethwa^{a)} gore e be (1) Moporofeta le Moruti wa rena e mogolo^{b)}. Ke yena yeo a re utolletšego ka botlalo morero wo o utilwego le thato ya Modimo mabapi le phološo ya rena^{c)}. (2) Gomme o tloditšwe go ba Moprista e mogolo wa rena a noši^{d)}, yeo a re phološitšego ka sehlabelo se tee fela sa mmele wa gagwe^{e)}. Mme gape ke yena yeo a ditšego a re rapelela go Tate^{f)}. (3) Gomme o tloditšwe gape le go ba Kgoši ya rena e sa felego, yeo e re bušago ka Lentšu le ka Moya wa gagwe, mme ke yena yeo a dutšego a re šireletša le go re boloka mo phološong yeo a re hweleditšego yona^{g)}.

(a) Ps. 45:8; Baheb. 1:9; Jes. 61:1; Luk. 4:18. (b) Doit. 18:15; Dit. 3:22; 7:37; Jes. 55:4. (c) Joh. 1:18; 15:15. (d) Ps. 110:4. (e) Baheb. 10:12,14; 9:12,14,28. (f) Barom. 8:34; Baheb. 9:24; 1 Joh. 2:1; Barom. 5:9,10. (g) Ps. 2:6; Sak. 9:9; Mat. 21:5; Luk. 1:33; Mat. 28:18; Joh. 10:28; Kut. 12:10,11.

Potšišo 32: Ke ka baka lang ge wena o bitšwa mokriste?^{a)}

Karabo: Ke ka gobane ka tumelo ke setho sa *Kriste*.^{b)} Ka tsela yeo ke ba le kabelo mo go tlotšweng ga gagwe.^{c)} Ka go realo ke na le gona go bolela leina la gagwe^{d)} mme gore ke ikgafe go yena ke be sehlabelo se se phelago.^{e)} Gomme ke tle ke kgone go lwantšha dibe le Diabolo ka letswalo le le lokologilego le le botse mo bophelong bjo;^{f)} mme ka morago ga mo ke tle ke kgone go buša mmogo le *Kriste* dibopiwa tšohle ka go sa felego.

(a) Dit. 11:26. (b) 1 Bakor. 6:15. (c) 1 Joh. 2:27; Dit. 2:17. (d) Mat. 10:32; Barom. 10:10. (e) Barom. 12:1; 1 Pet. 2:5,9; Kut. 1:6; 5:8,10. (f) 1 Pet. 2:11; Barom. 6:12,13; Bagal. 5:16,17; Baef. 6:11; 1 Tim. 1:18,19. (g) 2 Tim. 2:12; Mat. 25:34.

SONTAGA SA 13

Potšišo 33: Ke ka baka lang ge a bitšwa *Morwa Motswalwanoši wa Modimo*, etšwe le rena re le bana ba Modimo?

Karabo: Ke ka gobane Kriste ke yena fela e lego Morwa wa Modimo wa mehla yohle ka tlhago,^{a)} etšwe rena re amogetšwe go ba bana ba Modimo ka kgaugelo ka baka la gagwe.^{b)}

(a) Joh. 1:14; Baheb. 1:1,2; Joh. 3:16; 1 Joh. 4:9; Barom. 8:32, (b) Barom. 8:16; Joh. 1:12; Bagal. 4:6; Baef. 1:5,6.

Potšišo 34: Ke ka baka lang ge o mmitšša *Morena wa rena*?

Karabo: Ke ka gobane o re rekolotše dibeng tša rena ka moka, ka madi a gagwe a bohlokwa, e sego ka gauta goba silibere. O re rekolotše mmeleng le moyeng gore re be ba gagwe gomme o re phološitše maatleng ka moka a Diabolo.^{a)}

(a) 1 Pet. 1:18,19; 2:9; 1 Bakor. 6:20; 1 Tim. 2:6; Joh. 20:28.

SONTAGA SA 14

Potšišo 35: Na mantšu a a bolela eng: *yo a amogetšwego go Moya o Mokgethwa, a belegwa ke Maria kgarebe*?

Karabo: Ke gore Morwa yo a sa felego wa Modimo yeo e lego Modimo wa nnete yo a sa felego,^{a)} e a dulago a le bjalo,^{b)} o amogetše tlhago ya nnete ya bomotho mmeleng le mading a Maria kgarebe^{c)} ka tirelo ya Moya o Mokgethwa.^{d)} Ka go realo Kriste ke setlogolo sa Dafida ka go rereša^{e)} gomme o swana le banababo dilong ka moka^{f)} ka ntle ga sebe fela.^{g)}

(a) 1 Joh. 5:20; Joh. 1:1; 17:3; Barom. 1:3; Bakol. 1:15. (b) Barom. 9:5. (c) Bagal. 4:4; Luk. 1:31,42,43. (d) Mat. 1:20; Luk. 1:35. (e) Barom. 1:3; Ps. 132:11; 2 Sam. 7:12; Luk. 1:32; Dit. 2:30. (f) Bafil. 2:7; Baheb. 2:14,17. (g) Baheb. 4:15.

Potšišo 36: Na o hwetša mohola ofe ka ga kamogelo ye kgethwa le matswalo a Kriste?

Karabo: Ke hwetša mohola wa gore yena ke Mmoelanyi wa rena,^{a)} o khupetša sebe sa ka pele ga sefahlogo sa Modimo, sebe seo ke se amogetšego e bile ke tswaletšwego go sona, o se khupetša ka go hloka molato ga gagwe, le ka bokgethwa bja gagwe bjo bo tletšego.^{b)}

(a) Baheb. 7:26,27. (b) 1 Pet. 1:18,19; 3:18; 1 Bakor. 1:30,31; Barom. 8:3,4; Jes. 53:11; Ps. 32:1.

SONTAGA SA 15

Potšišo 37: Lentšu le: a hlokofatšwa o le kwišiša bjang?

Karabo: Ke le kwišiša ka mokgwa wo: Kriste o rwele kotlo ya bogale bja Modimo ka baka la sebe sa moloko wohle wa batho. Bogale bjo o bo rwele mmeleng le moyeng wa gagwe, bophelong bja gagwe ka moka mo lefaseng, kudukudu mafelelong a bophelo bja gagwe.^{a)} O phološitše mebele le meoya ya rena tshenyegong ye e sa felego,^{b)} ka mahloko ao a gagwe le ka sehlabelo sa gagwe sa poelanyo.^{c)} Ka mahloko ao a gagwe o re hweletša kgaugelo ya Modimo le toka le bophelo bjo bo sa felego.^{d)}

(a) Jes. 53:4; 1 Pet. 2:24; 3:18; 1 Tim. 2:6. (b) Bagal. 3:13; Bakol. 1:13; Baheb. 9:12; 1 Pet. 1:18,19. (c) Jes. 53:10; Baef. 5:2; 1 Bakor. 5:7; 1 Joh. 2:2; Barom. 3:25; Baheb. 9:28; 10:14. (d) Barom. 3:25; 2 Bakor. 5:21; Joh. 3:16; 6:51; Baheb. 9:15; 10:19.

Potšišo 38: Na ke ka baka lang ge a ile a hlokofatšwa mehleng ya moahlodi Pontio Pilato?

Karabo: O re lokolotše kahlolong ya bogale bja Modimo yeo e bego e re lebane,^{a)} ka ge a ahlotšwe ke moahlodi wa kgoro ya lefase e lego Pontio Pilato,^{b)} a se na molato.

(a) Ps. 69:5; Jes. 53:4,5; 2 Bakor. 5:21; Bagal. 3:13. (b) Joh. 18:38; Mat. 27:24; Luk. 23:14,15; Joh. 19:4.

Potšišo 39: Na lehu la papolo ya Jesu sefapanong le na le mohola go feta ge a ka be a hwile lehu le lengwe fela naa?

Karabo: E, gobane ka lehu le la sefapano ke na le therešo e tiileng ya gore o rwele thogako ye e bego e ntebane,^{a)} ka gobane lehu le la sefapano Modimo o le rogakile.^{b)}

(a) Bagal. 3:13. (b) Doit. 21:23.

SONTAGA SA 16

Potšišo 40: Na ke ka baka lang ge Kriste a ikokobeditše go iša lehung?

Karabo: Go ya ka toko le therešo ya Modimo,^{a)} go be go se na tsela ye nngwe yeo re ka lefelwago sebe ka yona ge e se ka tsela ya lehu la Morwa wa Modimo.^{b)}

(a) Gen. 2:17. (b) Barom. 8:3,4; Baheb. 2:14,15.

Potšišo 41: Na ke ka baka lang ge a ile a *bolokwa*?

Karabo: E be e le go bea bohlatse bja gore ka nnete o hwile.^{a)}

(a) Dit. 13:29; Mat. 27:59,60. Luk. 23:53; Joh. 19:38.

Potšišo 42: Ge e le gore Kriste o re hwetše, ke ka baka lang ge bjale le rena re swanetše go hwa?

Karabo: Ke gobane lehu la rena ga se tefelo ya dibe tša rena,^{a)} eupša ke go hwela dibe fela e bile ke tsela ye e išago bophelong bjo bo sa felego.^{b)}

(a) Mark. 8:37; Ps. 49:8. (b) Bafil. 1:23; Joh. 5:24; Barom. 7:24.

Potšišo 43: Na ke mohola ofe o re o hwetšago gape mo sehlabelong le lehung la Kriste sefapanong?

Karabo: Ka maatla a Kriste motho wa rena wa kgale o a bapolwa, o a bolawa mme o bolokwa gammogo le Kriste,^{a)} ka baka leo dikganyogo tše mpe tša nama tše di lego mo go rena di ka se sa kgona go re laola;^{b)} eupša re kgona go ineela go yena bjalo ka sehlabelo sa tebogo.^{c)}

(a) Barom. 6:6. (b) Barom. 6:6,12. (c) Barom. 12:1.

Potšišo 44: Ke ka baka lang go latela mantšu a: *A fologela heleng*?

Karabo: Ke ka baka la gore nna ke be le bonnete le khomotšo ye e tiilego ya gore, mo dintweng tša ka tše boima, Morena wa ka, Jesu Kriste, o mphološitše bohlokong le tlalolong ya hele.^{a)} O dirile bjalo ka tlalelo ya gagwe ye e šitwago go ka bolelwa, ka matshwenyego, ka letšhogo, ka masetlapelo a dihele – tšeo a di kwelego matšatšing a mahloko a gagwe,^{b)} kudukudu sefapanong.

(a) Jes. 53:5. (b) Ps. 18:5,6; 116:3; Mat. 26:38; 27:46; Baheb. 5:7.

SONTAGA SA 17

Potšišo 45: Na tsogo ya Kriste e na le mohola ofe go rena?

Karabo: Sa pele ke gore ka tsogo ya gagwe o fentše lehu.^{a)} E le gore a tle a re nee kabelo ya toko yeo a re hweleditšego yona ka lehu la gagwe. Sa bobedi le rena re tsošetšwa bophelong bjo bofsa ka maatla a gagwe.^{b)} Sa boraro ke gore tsogo ya Kriste ke peeletšo ye e tiilego ya go re re tla tsogela phološong.^{c)}

(a) Barom. 4:25; 1 Pet. 1:3; 1 Bakor. 15:16. (b) Barom. 6:4; Bakol. 3:1,3; Baef. 2:5,6. (c) 1 Bakor. 15:20,21.

SONTAGA SA 18:

Potšišo 46: Na mantšu a arego a rotogela legodimong o a kwišiša bjang?

Karabo: Ke a kwišiša ka mokgwa wa gore Kriste o rotošeditšwe legodimong, barutiwa ba gagwe ba mo lebeletše ge a tloga lefaseng a eya legodimong.^{a)} Goba ga gagwe legodimong go re fetogela mohola,^{b)} go fihlela ge a boa go tlo ahlola ba ba phelago le ba ba hwilego.^{c)}

(a) Dit. 1:9; Mark. 16:19; Luk. 24:51. (b) Baheb. 9:24; 4:14; Barom. 8:34; Bakol. 3:1. (c) Dit. 1:11; Mat. 24:30.

Potšišo 47: Na Kriste ga a gona mo go rena go fihlela bofelong bja lefase bjalo ka ge a re holofeditše^{a)} naa?

Karabo: Kriste ke motho wa nnete le Modimo wa nnete. Fela ka tlhago ya gagwe ya botho ga a gona mono lefaseng.^{b)} Eupša ka bomodimo bja gagwe, bogolo, kgaugelo le Moya wa gagwe a ka se tsoge a re tlogetše.^{c)}

(a) Mat. 28:20. (b) Baheb. 8:4; Mat. 26:11; Joh. 16:28; 17:11; Dit. 3:21. (c) Joh. 14:18; Mat. 28:20.

Potšišo 48: Na ge botho bja gagwe bo se gona gohle mo bomodimo bja gagwe bo lego gona, na tlhago tše pedi tše tša gagwe di a aroganywa naa?

Karabo: Aowa, le ganyane; gobane bomodimo bo ka se šireletšwe ke selo, gomme bo gona gohle.^{a)} Ka baka leo re kwišiša gore bomodimo bo gona ka ntle ga botho bjo a bo amogetšego.^{b)} E bile gape bomodimo bo gona go botho, mme gape ka sebele bomodimo bo swaragane le botho ka mehla.

(a) Jer. 23:24; Dit. 7:49. (b) Bakol. 2:9; Joh. 3:13; 11:15; Mat. 28:6.

Potšišo 49: Na thotogelo ya Jesu legodimong e na le mohola ofe mo go rena?

Karabo: Sa pele ke gore Jesu ke Morapeledi wa rena legodimong go Tate.^{a)} Sa bobedi ke gore nama ya rena e na le peeletšo ye e tiilego legodimong, ya go re Kriste e lego hlogo, rena re lego ditho tša gagwe, o tlo re tšeela go yena.^{b)} Sa boraro: Ke gore o re romela Moya wa gagwe wo e lego peeletšo ye e šalago.^{c)} Ka maatla a gagwe ga re nyake tše di lego mo lefaseng, eupša re phegelela tše di lego legodimong mo Kriste a lego gona mme a dutše ka letsogong le letona la Modimo.^{d)}

(a) 1 Joh. 2:1; Barom. 8:34. (b) Joh. 14:2; 17:24; 20:17; Baef. 2:6. (c) Joh. 14:16; 16:7; Dit. 2:33; 2 Bakor. 1:22; 5:5. (d) Bakol. 3:1.

SONTAGA SA 19

Potšišo 50: Na ke ka baka lang ge go oketšwa ka mantšu a rego: *O dutše letsogong le letona la Modimo?*

Karabo: Ke ka gobane Kriste o rotogetše legodimong ka baka la gore a ipontšha e le hlogo ya kereke ya Bokriste.^{a)} Ke yena yeo Tate a bušago tšohle ka yena.^{b)}

(a) Baef. 1:20-23; Bakol. 1:18. (b) Mat. 28:18; Joh. 5:22.

Potšišo 51: Na letago le la hlogo ya rena e lego Kriste le na le mohola ofe mo go rena?

Karabo: Sa pele ke gore ka Moya wa gagwe o Mokgethwa, Kriste o re tšhollela dimpho tša legodimo^{a)} rena re lego ditho tša gagwe. Gape o re šireletša le go re boloka manabeng ohle a rena ka maatla a gagwe.^{b)}

(a) Dit. 2:33; Baef. 4:8. (b) Ps. 2:9; 110:1,2; Joh. 10:28; Baef. 4:8.

Potšišo 52: Na wena o homotšega bjang ka ga taba ye e rego: *Kriste o tla boa go ahlola ba ba phelago le ba ba hwilego?*

Karabo: Ke homotšega ka go re: Ka gare ga manyami le ditlhorišo ka moka ke emetše Kriste bjalo ka Moahlodi yo a tšwago legodimong.^{a)} Ke yena yo a nkwetšego bohloko ka go ipea pele ga kotlo ya Modimo, a ba a tloša thogako ka moka go nna. Ke yena yeo a tlogo go lahlela manaba a ka le a gagwe tshenyegong ye e sa felego.^{b)} Eupša nna le bohle bao ba kgethilwego o tlo re iša go yena lethabong le letagong la legodimo.^{c)}

(a) Bafil. 3:20; Luk. 21:28; Barom. 8:23; Tit. 2:13; 1 Bathes. 4:16. (b) Mat. 25:41; 2 Bathes. 1:6. (c) Mat. 25:34; 2 Bathes. 1:7.

MODIMO MOYA O MOKGETHWA LE KGETHAFATŠO YA RENA

SONTAGA SA 20

Potšišo 53: O dumelang ka ga Moya o Mokgethwa?

Karabo: Sa pele ke dumela gore Moya o Mokgethwa le Tate le Morwa ke Modimo wa nnete yo a sa felego.^{a)} Sa bobedi ke dumela gape gore o filwe nna^{b)} gore ka tumelo ya nnete ke be le kabelo go Kriste le mediro yohle ya gagwe ya go loka.^{c)} A nkhomotše,^{d)} gomme a dule go nna ka go sa felego.^{e)}

(a) 1 Joh. 5:7; Gen. 1:2; Jes. 48:16; 1 Bakor. 3:16; 6:19; Dit. 5:3,4. (b) Bagal. 4:6; Mat. 28:19,20; 2 Bakor. 1:22; Baef. 1:13. (c) Bagal. 3:14; 1 Pet. 1:2; 1 Bakor. 6:17. (d) Joh. 15:26; Dit. 9:31. (e) Joh. 14:16; 1 Pet. 4:14.

SONTAGA SA 21

Potšišo 54: O dumela eng ka ga Kereke e kgethwa ya bohle?

Karabo: Ke dumela gore Morwa wa Modimo,^{a)} gare ga mehuta ka moka ya batho,^{b)} o ikgobokeletša phuthego, a e boloka, a e šireletša.^{c)} O kgethetše phuthego yé bophelo bjo bo sa felego.^{d)} O e kgethile ka Moya wa gagwe le ka Lentšu la gagwe^{e)} boteeng bja tumelo ya nnete,^{f)} go tloga mathomong a lefase go fihla bofelong.^{g)} Gomme ke dumela gore le nna ke setho sa yona se se phelago,^{h)} le gore ke tlo ba sona ka mehla.ⁱ⁾

(a) Baef. 5:26; Joh. 10:11; Dit. 20:28; Baef. 4:11-13. (b) Gen. 26:4; Kut. 5:9. (c) Mat. 16:18; Joh. 10:28-30; Ps. 129:1-5. (d) Barom. 8:29; Baef. 1:10-13. (e) Jes. 59:21; Barom. 1:16; 10:14-17; Baef. 5:26. (f) Dit. 2:42; Baef. 4:3-5. (g) Ps. 71:17, 18; Jes. 59:21; 1 Bakor. 11:26. (h) 1 Joh. 3:14,19-21; 2 Bakor. 13:5; Barom. 8:10. (i) Ps. 23:6; 1 Bakor. 1:8,9; Joh. 10:28; 1 Joh. 2:19; 1 Pet. 1:5.

Potšišo 55: Na o kwišiša eng ka mantšu a rego *tshwaragano* ya *bakgethwa*?

Karabo: Sa pele: Ke kwišiša gore badumedi ka moka, le ka o tee ka o tee, e le ditho, ba na le kabelo go Morena Jesu le mahumong le dimphong tša gagwe.^{a)} Sa bobedi: ke kwišiša gore e mongwe le e mongwe a tle a tsebe gore o na le tshwanelo ya go hola le go phološa ditho tše dingwe ka dimpho tša gagwe; a dira tše o ka go ineela le ka lethabo.^{b)}

(a) 1 Joh. 1:3; Barom. 8:32; 1 Bakor. 12:12,13; 1 Bakor. 6:17. (b) 1 Bakor. 12:21; 13:1,5; Bafil. 2:4-8.

Potšišo 56: O dumela eng ka ga tebelelo ya dibe?

Karabo: Ke dumela gore Modimo ga a sa rata go gopola dibe tša ka ka moka, ka baka la tiro ye e lekanego ye e dirilwego ke Kriste. Gape Modimo ga a sa rata go gopola tlhago ya ka ya dibe, yeo ke swanelago go e lwantšha bophelong bja ka ka moka.^{a)} Eupša o rata go nnea toka ya Kriste ka kgaugelo ^{b)} gore ke se ke ka ba ka tsoga ke tsene kotlong ya Modimo.^{c)}

(a) 1 Joh. 2:2; 1:7; 2 Bakor. 5:19. (b) Barom. 7:23-25; Jer. 31:34; Mika 7:19; Ps. 103:3,10,12. (c) Joh. 3:18; 5:24.

SONTAGA SA 22

Potšišo 57: Tsogo ya mmele e go nea khomotšo efe naa?

Karabo: Khomotšo ya ka ke gore ge ke ehwa moya wa ka o tlo rotogela go Kriste ka pela, e lego hlogo ya wona.^{a)} Go feta fao nama ye ya ka e tlo tšošwa ka maatla a Kriste, mme e tla kopanywa gape le moya wa ka, ya swana le sebopego sa mmele wo o tagafaditšwego wa Kriste.^{b)}

(a) Luk. 16:22; 23:43; Bafil. 1:21,23. (b) Job. 19:25,26; 1 Joh. 3:2; Bafil. 3:21.

Potšišo 58: Na o bona khomotšo efe mabapi le thuto ye ya Bophelo bjo bo sa felego?

Karabo: Ke bona khomotšo ya go re bjale ke kwa mohlodi wa lethabo le le sa felego ka pelong ya ka.^{a)} Go feta fao ka morago ga bophelo bjo ke tlo ba le phološo ye e sa felego. Ké phološo yeo e sa kago ya bonwa ke leihlo, le yeo e sa kago ya kwewa ke tsebe, le yeo e sa kago ya tsená pelong ya motho. E le gore bophelong bjo bo sa felego ke tle ke rete Modimo ka mehla yohle.^{b)}

(a) 2 Bakor. 5:2,3. (b) 1 Bakor. 2:9.

SONTAGA SA 23

Potšišo 59: Na gabotse-botse go go holang ge o dumela ditaba tše, e lego Boipolelo bja Tumelo bja Baapostola ka moka naa?

Karabo: Ke holega ka gore ke lokafetše pele ga Modimo ka Kriste, e bile ka yena ke mojaléfa wa bophelo bjo bo sa felego.^{a)}

(a) Hab. 2:4; Barom 1:17; Joh. 3:36.

Potšišo 60: O lokafetše bjang pele ga Modimo?

Karabo: Ke lokafetše fela ka tumelo ya nnete go Jesu Kriste.^{a)} E le gore Modimo o mpha seloba seo se mo kgotsofatšago,^{b)} o mpha le tokofatšo le kgalalelo ya Kriste,^{c)} mme o mpalela tšona.^{d)} O mpha tšona ka kgaugelo fela^{e)}, ka ntle le gore ke itirele selo.^{f)} O a mpha, e bile o mpalela tšona bjalo ka ge nke ga se nke ka dira sebe. O mpha bjalo ka ge nke ke nna ka bonna ke phethagaditšego go kwa seo Kriste a mphethetšego sona, e lego go kwa Modimo,^{g)} ge ke amogela modiro wo mobotse wo ka tumelo.^{h)} O mpha tšona le ge letswalo la ka le mpea molato wa go re ka nnete ke tshetše melao ya Modimo, le gore ga go le ka o tee wa yona wo ke o phethilego,ⁱ⁾ le gore gape ka nako tšohle ke ntše ke sekamela bobeng bjohle.^{j)}

(a) Barom. 3:21,22,24; 5:1,2; Bagal. 2:16; Baef. 2:8,9; Bafil. 3:9. (b) 1 Joh. 2:2. (c) 1 Joh. 2:1. (d) Barom. 4:4; 2 Bakor. 5:19. (e) Barom. 3:24; Baef. 2:8. (f) Tit. 3:5; Doit. 9:6; Hesek. 36:22. (g) 2 Bakor. 5:21. (h) Barom. 3:22; Joh. 3:18. (i) Barom. 3:9. (j) Barom. 7:23.

Potšišo 61: Ke ka baka lang ge o re o lokafetše fela ka tumelo?

Karabo: Ge ke realo ga se gore ke kgahla Modimo ka bohlokwa bja tumelo ya ka, eupša ke gore toka ya ka pele ga Modimo ke toka, kgalalelo le seloba sa Kriste se se kgotsofatšago Modimo. Ke tšona fela e lego toka ya ka pele ga Modimo,^{a)} le gore ga go tsela ye ngwe yeo nka di amogelago le go itšeela tšona kantle ga tumelo fela.^{b)}

(a) 1 Bakor. 1:30; 2:2. (b) 1 Joh. 5:10.

SONTAGA SA 24

Potšišo 62: Ke ka baka lang ge mediro e mebotse ya rena e šitwa go re lokafatša pele ga Modimo goba ya dira karolo ya tokafatšo yeo naa?

Karabo: Toka ye e hlokegago pele ga kahlolo ya Modimo e swanetše go ba ye e phethagetšego ka botlalo, gape e be toka ye e lekanetšego le molao wa Modimo ka gohle,^{a)} eupša mediro ya rena ye e lokilego ka go feitišiša bophelong bjo ka moka ga yona ga ya phethagala, gape e tšhilafaditšwe ke dibe.^{b)} Ka baka leo mediro ye mebotse ya rena e šitwa go re lokafatša pele ga Modimo.

(a) Bagal. 3:10; Doit. 27:26. (b) Jes. 64:6.

Potšišo 63: Na mediro ya rena ye mebotse ga e putswe ka selo, le ge Modimo a rata go e putsa bophelong bjo le bophelong bjo bo tlogo?

Karabo: Modimo o re nea moputso wo ka kgaugelo ya gagwe, e sego ka baka la mediro ya rena ya mebotse.^{a)}

(a) Luk. 17:10.

Potšišo 64: Na thuto ye ga e dire gore batho ba itirele ka go rata, ba be ba kgopo naa?

Karabo: Aowa, ka gobane ga go kgonege gore motho yo a hlomilwego go Kriste ka tumelo ya nnete, a se ke a bea dikenywa tša tebogo.^{a)}

(a) Mat. 7:18; Joh. 15:5.

DISAKRAMENTE

SONTAGA SA 25

Potšišo 65: Bjalo ka ge e le tumelo fela, yeo e dirago gore re be le kabelo go Kriste le mašotong ohle a gagwe, na tumelo ya mohuta wo e tšwa kae?

Karabo: Tumelo e bjalo e tšwa go Moya o Mokgethwa.^{a)} O hlagiša tumelo ka go rena ka kgašo ya Ebangedi ye kgethwa, mme o e tliša ka tirišo ya disakramente.^{b)}

(a) Baef. 2:8; 6:23; Joh. 3:5; Bafil. 1:29. (b) Mat. 28:19; 1 Pet. 1:22,23.

Potšišo 66: Disakramente ke eng?

Karabo: Disakramente ke dipontšho le maswao a makgethwa a bonalago, ao a hlomilwego ke Modimo gore ka go a diriša re kgone go kwišiša dikholofetšo tša ebangedi le go di tliša. Dikholofetšo tše ke go re: ka baka la sehlabelo se tee fela sa Kriste, se se ilego sa phethega sefapanong, Modimo o re nea tshwarelo ya dibe le bophelo bjo bo sa felego ka kgaugelo fela.^{a)}

(a) Gen. 17:11; Barom. 4:11; Doit. 30:6; Lev. 6:25; Baheb. 9:7,8,9,24; Hesek. 20:12; Jes. 6:6,7; 54:9.

Potšišo 67: Na maikemišetšo a Lentšu mmogo le disakramente di beetšwe go šupa tumelo ya rena go sehlabelo sa Jesu Kriste sefapanong gore ke wona motheo wa phološo ya rena fela naa?

Karabo: E, ka nnete, gobane Moya o Mokgethwa o re ruta mo ebangeding e bile o re tlišetša ka disakramente gore phološo ya rena ye e

phethegilego e theilwe godimo ga sehlabelo se nnoši sa Kriste se se phethagetšego sefapanong.^{a)}

(a) Barom. 6:3; Bagal. 3:27.

Potšišo 68: Kriste o hlomile disakramente tše kae mo Kgweranong e Mpsha goba Testamenteng e Mpsha?

Karabo :Ke tše pedi, e lego Kolobetšo e Kgethwa le Selalelo se se Kgethwa.

KOLOBETŠO E KGETHWA

SONTAGA SA 26

Potšišo 69: Na mo Kolobetšong e Kgethwa go bontšhwa le go tlišetšwa bjang gore, sehlabelo se tee sa Kriste sefapanong se tliša mohola go wena?

Karabo: Ka mokgwa wa gore Kriste o hlomile tthatso ya ka ntle,^{a)} mme a ba a holofetša^{b)} gore ka nnete ke hlatswiwa ditšhila tša moya wa ka, ka madi le moya wa gagwe, ke gore ke hlatswiwa dibe tšohle tša ka,^{c)} bjalo ka ge ke hlatswitšwe mmele ka meetse a a tlošago ditšhila tšohle.

(a) Mat. 28:19. (b) Mat. 28:19; Mark. 16:16; Dit. 2:38; Joh. 1:33; Mat. 3:11; Barom. 6:3,4. (c) 1 Pet. 3:21; Mark. 1:4; Luk. 3:3.

Potšišo 70: Go hlatswiwa ka madi le Moya wa Kriste go bolela eng?

Karabo: Go bolela go amogela tshwarelo ya dibe e tšwago go Modimo ka kgaugelo, ka baka la madi a Kriste ao a tšholletšwego rena sehlabelong sa gagwe sefapanong.^{a)} Gape ke go mpshafatšwa ke Moya o Mokgethwa le go kgethelwa ke yena go ba ditho tša Kriste, e le gore go ya le go ya re hwe dibeng, mme re phele bophelo bjo bo se nago bosodi, bjo bo kgahlago Modimo.^{b)}

(a) Baheb. 12:24; 1 Pet. 1:2; Kut. 1:5; 7:14; Sak. 13:1; Hesek. 36:25. (b) Joh. 1:33; 3:5; 1 Bakor. 6:11; 12:13; Barom. 6:4; Bakol. 2:12.

Potšišo 71: Jesu Kriste o re tshepišitše kae gore ka nnete o tla re hlatswa ka madi le Moya wa gagwe, bjalo ka ge re hlapišwa ka meetse a kolobetšo?

Karabo: Ke ge a hloma kolobetšo ge a re: *Yang lefaseng ka moka le dire ditšhaba ka moka barutiwa ka go ba kolobetša leineng la Tate le la Morwa le la Moya o Mokgethwa* (Mat. 28:19). Gape *E a dumelago mme*

a kolobetšwa, o tlo phološwa, e a sa dumelego o tlo lahlwa. (Mark. 16:16). Yona kholofetšo ye e bušetšwa gape mo Mangwalo a bolelago ka kolobetšo a re ke *tihatso ya go tswalwa la bobedi le go hlatswiwa ga dibe.* (Tit. 3:5; Dit. 22:16).

SONTAGA SA 27

Potšišo 72: Na tihatso ya kantle ka meetse ke yona ye e tlošago dibe ka boyona?

Karabo: Aowa,^{a)} gobane ke madi a Morena Jesu Kriste le Moya o Mokgethwa fela ao a re hlatswago dibeng tša rena ka moka.^{b)}

(a) Mat. 3:11; I Pet 3:21; Baef. 5:26. (b) I Joh. 1:7; I Bakor. 6:11.

Potšišo 73: Ke ba baka lang ge Moya o Mokgethwa o bolela gore kolobetšo ke tihatso ya go tswalwa la bobedi le go hlatswiwa ga dibe?

Karabo: Modimo o bolela bjalo ka mabaka a tiilego. Ka go realo o rata go re ruta gore, bjalo ka ge meetse a tloša tšhila ya mmele, go bjalo ka madi le Moya wa Jesu Kriste a tloša dibe tša rena.^{a)} Go feta moo Modimo o bolela bjalo, ka gobane ka tlemaganyo ye ya bomodimo le tšhupo ye e tiilego o rata go re tiiša gore ka nnete re hlatswitšwe moyeng dibeng tša rena bjalo ka ge re hlatswitšwe ka meetse.^{b)}

(a) Kut. 1:5; 7:14; I Bakor. 6:11. (b) Mar. 16:16; Bagal. 3:27.

Potšišo 74: A bana le bona ba swanetše go kolobetšwa?

Karabo: E, gobane le bona ba amogetšwe kgweranong ya Modimo le kerekeng ya gagwe bjalo ka batho ba bagolo.^{a)} Le go bona go holofeditšwe tlemollo dibeng ka madi a Kriste bjalo ka ge go holofeditšwe go batho ba bagolo e sego ka gonyane,^{b)} ba holofeditšwe gape le Moya o Mokgethwa wona wo o hlolago tumelo.^{c)} Ka baka leo ba swanetše go tsenywa mo kerekeng ya bokriste ka kolobetšo e lego leswao la kgwerano.^{d)}

Ka go realo ba tlo ahloganywa le bana ba bao ba sa dumelego, bjalo ka ge go be go dirwa kgweranong goba Testamenteng e Tala ka mokgwa wa lebollo,^{e)} leo le emetšwego ke kolobetšo mo kgweranong e mphsa.^{f)}

(a) Gen. 17:7, 12; (b) Mat. 19:14; (c) Luk. 1:15; Ps. 22:10; Jes. 44:1-3; Dit. 2:39; (d) Dit. 10:47; (e) Gen. 17:14; (f) Bakol. 2:11-13.

SELALELO SE SE KGETHWA SA MORENA WA RENA

SONTAGA SA 28

Potšišo 75: Mo Selalelong se se Kgethwa o bontšhwa le go tlišetšwa ke eng gore o na le kopano go sehlabele se le noši sa Kriste seo se phethagaditšwego sefapanong le go tše botse tšohle tšeo e lego tša Kriste?

Karabo: Ka mokgwa wo: gore Kriste o laetše nna le badumedi bohle gore re je senkgwa se robjago sé, le go nwela senwelong se e le gona go mo gopola, gomme a ba a holofetša gape.^{a)}

(a) Mat. 26:26-28; Mar. 14:22-24; Luk. 22:19, 20; I Bakor. 10:16, 17; 11:23-25; 12:13.

Potšišo 76: “Go ja mmele wa Kriste wo o robilwego le go nwa madi a gagwe a a tšholotšwego”, ke go reng?

Karabo: Ke go amogela ka pelo ye e dumelago ditshwenyego ka moka le go hwa ga Kriste mme ka go realo gwa amogetšwa tebalelo ya melato le bophelo bjo bo sa felego.^{a)} Go feta moo Moya o Mokgethwa, yo a agilogo go Kriste le go rena, o re kopanya le mmele wa Kriste,^{b)} e le gore le ge Kriste a le legodimong^{c)} mme rena re le mo lefaseng re sa ntše re le nama ya nama ya gagwe le lešapo la mašapo a gagwe.^{d)} Bjalo ka ditho tša mmele o tee di phela mme di bušwa ke moya o tee, ka mokgwa o bjalo re phela ka Moya o tee, gape re bušwa ke yena.

(a) Joh. 6:35,40,47,48,50,51,53,54; (b) Joh. 6:55, 56; (c) Bakol. 3:1; Dit. 3:21; I Bakor. 11:26; (d) Baef. 5:29, 30; 3:16; I Bakor. 6:15; I Joh. 3:24; 4:13; (e) Joh. 6:57; 15:1-6; Baef. 4:15, 16.

Potšišo 77: Kriste o holofeditše badumedi kae gore, bjalo ka ge ba eja senkgwa se se robilwego le go nwa senwelo seo, ka mokgwa o bjalo o rata go ba fepa ka mmele wa gagwe le go ba nweša madi a gagwe?

Karabo: Kriste o ba holofeditše tše ge a hloma selalelo se sekgethwa^{a)} bjalo ka ge re bala go I Bakor. 11:23-26: *Morena Jesu, bošego bjo a ekilwego ka bjona, o tšere senkgwa. A re go se ngwatha a re: Tšeang le je; ké mmele wa ka o jewago ka baka la lena. Dirang bjalo e be go nkgopola. Ka mokgwa o bjalo a tšea le senwelo ka morago ga*

selalelo, a re: Senwelo se ke kgwerano e mphsa mo mading a ka; dirang bjalo ka mehla ge le se nwa, e be go nkgopola. Ke gona ka mehla ge le eja senkgwa se, le enwa senwelo se, le tsebatše lehu la Morena go fihla ge a etla. Yona tshepišo ye e boeletšwa gape ke moapostola Paulo ge a ngwala bjalo ka ge re bala go I Bakor. 10:16,17: Senwelo sa tšhegofatšo se re se šegofatšago, a ga se kopano ya madi a Kriste? Senkgwa se re se ngwathago, a ga se kopano ya mmele wa Kriste? Senkgwa e le se tee, rena ba re lego ba bantiši re ba mmele o tee; gobane senkgwa re ja se tee ka moka ga rena.

(a) Mat. 26:26-28; Mar. 14:22-24; Luk. 22:19, 20.

SONTAGA SA 29

Potšišo 78: A senkgwa se fetoga mmele wa Kriste le beine madi a gagwe ka sebele naa?

Karabo: Aowa;^{a)} meetse a kolobetšo ga a fetogè madi a Kriste e bile ga se yona tlhatso ya dibe ka sebele; e fo ba fela pontšho ya nnete le tlišetšo ya Modimo.^{b)} Ka mokgwa o bjalo le senkgwa mo selalelong ga se fetoge mmele wa Kriste,^{c)} senkgwa se se bitšwa mmele wa Kriste ka baka a mokgwa le semelo sa disakramente.^{d)}

(a) Mat. 26:29; (b) Baef. 5:26; Tit. 3:5; (c) I Bakor. 10:16; 11:26; (d) Gen. 17:10,11; Eks. 12:11,13; 13:9; I Pet. 3:21; I Bakor. 10:3, 4.

Potšišo 79: Ke ka baka lang ge Kriste a re senkgwa ke mmele wa gagwe mme senwelo sa beine ke madi a gagwe, goba kgwerano e mphsa mading a gagwe, mme Paulo yena a re ke kopano le mmele le madi a Kriste?

Karabo: Kriste o boletše tšeo ka mabaka a tiilego. Ka go realo o rata go re ruta gore, bjalo ka ge senkgwa le beine di fepa motho mo bophelong bjo, go bjalo le mmele wa gagwe wo o robilwego le madi a tšholotšwego ke sejo le seno sa mmakgonthe seo se fepago meoya ya rena go iša bophelong bjo bo sa felego.^{a)} Go feta moo Kriste o rata go re tlišetša ka dipontšho le dipeeletšo tšé, tše di bonwago gore re ba le kabelo mmeleng le mading a nnete a gagwe ka tiro ya Moya o Mokgethwa. Bjalo ka ge re amogela dipontšho tšé, tše kgethwa ka molomo wa nama gore re mo gopole.^{b)} Gape ke gore mahloko le go kwa Modimo ga gagwe, ka

nnete ke tša rena bjalo ka ge e ke ke rena ka sebele re hlokofaditšwego ra ba ra kgonā go kgotsofatša Modimo ka dibe tša rena.

(a) Joh. 6:55; (b) I Bakor. 10:16.

SONTAGA SA 30

Potšišo 80: Na go na le phapano efe magareng a selalelo sa Morena le missa wa kereke ya Roma?

Karabo: Selalelo sa Morena se bolela go rena gore re na le tshwarelo ye e phethagetšego ya dibe tša rena ka moka ka sehlabelo se tee sa Jesu Kriste se a se phethilego ka noši gatee sefapanong.^{a)} Se bolela gore re kopantšwe ka Moya o Mokgethwa le Kriste^{b)} yo go ya ka tlhago ya bomotho bja gagwe a sego gona go rena gona bjale mo lefaseng, eupša a le legodimong letsogong le letona la Modimo Tatagwe;^{c)} moo a ratago gore re mo rapele.^{d)}

Etšwe missa wa kereke ya Roma o ruta gore ba ba phelago le ba ba hwilego ga ba fiwe tebelelo ya melato ka ditlaešego tša Kriste, ge e se ge Kriste a ka direlwa bona sehlabelo ka mehla ke baprista ba ba fago missa. Gape o ruta gore Kriste ka mmele wa gagwe o gona mo senkgweng le beineng; mme ka baka leo mo go tšona le gona o swanetše go rapelwa. Ka fao, missa ka motheo wa ona ke kganetšo fela ya sehlabelo se tee le ditlhokofatšo tša Jesu Kriste, ke tirelo ye e rogakilwego ya medingwana.^{e)}

(a) Baheb. 10:10, 12; 7:26, 27; 9:12, 25; Joh. 19:30; Mat. 26:28; Luk. 22:19; (b) I Bakor. 10:16,17; 6:17; (c) Joh. 20:17; Bakol. 3:1; Baheb. 1:3; 8:1; (d) Mat. 6:20,21; Joh. 4:21; Luk. 24:52; Dit. 7:55; Bakol. 3:1; Bafil. 3:20; I Bathes. 1:10; (e) Baheb. 9:26; 10:12, 14.

Potšišo 81: Selalelo sa Morena se hlometšwe bomang?

Karabo: Se hlometšwe bao ba inyatšago ka baka la dibe tša bona ba bile ba holofela gore ba di lebaletšwe ka baka la Kriste, le gore bofokodi bjo bo sa lego gona bo khupeditšwe ke ditlhorišo le lehu la gagwe. Gape se hlometšwe bao ba fišegelago gore ka nako tšohle tumelo ya bona e tiišwe mme bophelo bja bona bo kaonafatšwe. Eupša ge e le baikaketši le bao ba sa sokologelago go Modimo ka dipelo tše di rerešago, bona bao ba itšela ba bile ba inwela tahlo.^{a)}

(a) I Bakor. 11:28; 10:19-22.

Potšišo 82: Bao ba itshwereco bjalo ka ba ba sa dumelego le bakgopo ka boipolelo le ka bophelo bja bona, na le bona ba na le tokelo ya go amogelwa selalelong se?

Karabo: Aowa; gobane ka mokgwa o bjalo kgwerano ya Modimo e a nyefolwa, mme kgalefo ya gagwe ya tukela phuthego ka moka.^{a)} Ke ka baka leo kereke ya bokriste e tlemegilego, go ya ka ditaello tša Kriste le tša baapostola ba gagwe go tswalelela batho ba ba bjalo kantle ka dinotlelo tša mmušo wa magodimo, go fihlela ge bona ba šupetša kaonafatšo ya bophelo bja bona.

(a) I Bakor. 11:20,34; Jes. 1:11; 66:3; Jer. 7:21; Ps. 50:16.

SONTAGA SA 31

Potšišo 83: Dinotlelo tša mmušo wa legodimo ke eng?

Karabo: Ke kgašo ya ebangedi ye kgethwa le go kgaolwa ka sekriste goba go ripiwa phuthegong ya bokriste. Ka ditiro tše pedi tše mmušo wa legodimo o bolelwa badumedi mme o tswalelwa ba ba sa dumelego.

Potšišo 84: Na mmušo wa legodimo o bulwa le go tswalelelwa bjang ka kgašo ye ya ebangedi e kgethwa?

Karabo: Mmušo wa legodimo o bulwa ge ka taello ya Kriste go tsebagatšwa le go phatlalatšwa go badumedi gammogo, le go e mongwe le e mongwe wa bona, gore Modimo o tloga a ba lebaletše dibe tša bona ka baka la seo ba se diretšwego ke Kriste. Ba lebaletšwa dibe ge ba amogela kholofetšo ya ebangedi ka tumelo ya mokgonthe.

Mmušo wa legodimo o tswalelelwa bohle bao ba sa dumelego le bao ba sa sokologego ka botlalo, ge go tsebagatšwa le go phatlalatšwa go bona gore bogale bja Modimo le thogako ye e sa felego di fela di ba okametše ge ba sa gana go sokologa.^{a)} Go ya ka bohlatse bjo bja ebangedi, Modimo o tlo ahlola batho bophelong bjo le bjo bo sa tlogo.

(a) Joh. 20:21-23; Mat. 16:19.

Potšišo 85: Na mmušo wa magodimo o tswalelwa le go bulwa bjang ka kgaolo ye ya sekriste?

Karabo: Ka taelo ya Kriste mmušo wa legodimo o tswalelelwa batho bao tumelo ya bona le bophelo bja bona di itaetšago e se tša sekriste mola ba ipitšha bakriste; gomme ba gana go tlogela bokgelogi bja bona goba bophelo bja bona bja dihlong, le ge ba eleditšwe gantši ka moya wa setswalle sa bodumedi. Batho ba bjalo ba swanetše go begwa phuthegong goba kopanong ya bao ba kgethetšwego modiro woo ke phuthego. Ge ba sa šetše dikeletšo tšeo, gona ba tlo thibelwa go šomiša disakramente, ke bao ba kgethetšwego modiro woo. Ka morago ga fao ba tlo kgaolwa phuthegong gomme ba tswalelelwa ntle ke Modimo ka noši mmušong wa Kriste.

Mmušo wa legodimo o bulwa ge batho bao ba holofetša mme ba laetša phetogo ya nnete gomme ba boela ba amogelwa go ba ditho tša Kriste le phuthego ya gagwe.^{a)}

(a) Mat. 18:15-17; I Bakor. 5:4, 5, 11; 2 Bakor. 2:6-8.

KAROLO YA BORARO

TEBOGO

SONTAGA SA 32

Potšišo 86: Bjalo ka ge re phološitšwe bomadimabeng bja rena ke Kriste, ka kgaugelo ya gagwe fela, e sego ka baka la modiro ofe goba ofe wo o tšwago go rena, ké ka baka lang ge re swanetše go fela re dira mediro e mebotse?

Karabo: Re swanetše go dira mediro e mebotse gore re tle re laetše tebogo go Modimo ka bophelo bja rena ka moka,^{a)} ka baka la kgaugelo ya gagwe ye a re laeditšego yona ge Kriste a ile a re reka ka madi a gagwe, a re lokolla a be a re mphšafatša ka Moya wa gagwe o Mokgethwa gore re swane le yena. Nepo e nngwe ya mediro ya rena e mebotse ke gore re godiše Modimo ka yona,^{b)} gore e mongwe le e mongwe wa rena a be le tielelo, ya tumelo ka boyena ka baka la dikenywa tša tumelo ya gagwe,^{c)} le gore re tle re gogele ba bangwe go Kriste ka mediro ya rena e mebotse.^{d)}

(a) Barom. 6:13; 12:1,2; I Pet. 2:5,9; I Bakor. 6:20; (b) Mat. 5:16; I

Pet. 2:12; (c) 2 Pet. 1:10; Mat. 7:17; Bagal. 5:6, 22; (d) I Pet. 3:1, 2; Barom. 14:19.

Potšišo 87: Bao ba ba phegelelago pele mo bophelong bja bona bjo kgopo le bja go hloka tebogo, mme ba sa sokologe le go Modimo, na ba ka se phološwe naa?

Karabo: Aowa, le ganyane; gobane Mangwalo a Makgethwa a re: Ba ba latelago ba ka se ke ba ba le kabelo mmušong wa Modimo: ba makgapha, ba ba rapelago medimo e šele, diotswa, mahodu, ba megabaru, matagwa, barogani, bahlakodi, goba le ba bangwe ba ba bjalo.^{a)}

(a) I Bakor. 6:9, 10; Baef. 5:5, 6; I Joh. 3:14.

SONTAGA SA 33

Potšišo 88: Tshokologo ya nnete ya motho e na le diripa tše kae?

Karabo: E na le diripa tše pedi: ke go hwa ga motho wa kgale le tsogo ya motho e mofsa.^{a)}

(a) Barom. 6:1, 4-6; Baef. 4:22-24; Bakol. 3:5, 6, 8-10; I Bakor. 5:7; 2 Bakor. 7:10.

Potšošo 89: Go hwa ga motho wa kgale ke eng?

Karabo: Ke go itshola ga makgonthe ka ge re galefišitše Modimo ka dibe tša rena, gore re fele re di hloya le go di tlogela.^{a)}

(a) Barom. 8:13; Joele 2:13; Hos. 6:1.

Potšišo 90: Naa tsogo ya motho e mofsa ke eng?

Karabo: Ke lethabo le le tletšego go Modimo ka Kriste,^{a)} gape ke tlhologelo le lerato le go rata go phela ka thato ya Modimo medirong yohle ye e lokilego.^{b)}

(a) Barom. 5:1; 14:17; Jes. 57:15; (b) Barom. 6:10, 11; Bagal. 2:20.

Potšišo 91: Mediro ye e lokilego ke eng?

Karabo: Ke mediro e dirwago fela ka tumelo ya nnete^{a)} ye e sepelago ka molao wa Modimo^{b)} ye e dirwago tlotlišong ya gagwe,^{c)} e sego ye e theilwego godimo ga megopolo goba melao ya batho.^{d)}

(a) Barom. 14:23; (b) Lev. 18:4; I Sam. 15:22; Baef. 2:10; (c) I Bakor. 10:31; (d) Hesek. 20:18, 19; Jes. 29:13; Mat. 15:7-9.

MOLAO

SONTAGA SA 34

Potšišo 92: Molao wa Modimo o reng?

Karabo: Ekisodo 20:1-17: *Mantšu a a boletšwego ke Morena ka moka šea; o itše:*

Ke Nna Morena Modimo wa gago. Ke Nna ke go ntšhitšego nageng ya Egepeta ngwakong wa bohlanka.

Molao wa Pele

Ke se ke ka bona o na le medimo e šele.

Molao wa Bobedi

O se ke wa itirela modimo wa go betlwa, le ge e le seswantšho se sengwe sa tše di lego kua legodimong, le ge e le sa tše di lego mono lefaseng, le sa tše di lego meetseng ka tlase ga lefase. O se ke wa di khunamela; o se ke wa di direla; ka gobane nna Morena Modimo wa gago ke Modimo yo bogale, e a latago bokgopo bja botata-go-bana go bana ba bona go fihla molokong wa boraro le wa bone mo go ba ba ntlhoilego. Gomme ge e le ba ba nthatago, ba ba hlokomelago melao ya ka ke ba dira ka botho go iša melokong e sekete.

Molao wa Boraro

O se ke wa bolela leina la Morena Modimo wa gago ka lefela; ka gobane e a bolelago leina la gagwe ka lefela, Morena a ka se ke a mo lesa a sa otlwe.

Molao wa Bone

Gopola letšatši la go khutša, o le kgethe. O sware mediro ka matšatši a a seelago, o phethe mešomo ya gago ka moka. Ge e le letšatši la go šupa ke la go khutša, ke la Morena Modimo wa gago. ka lona o se ke wa swara modiro le o tee, le ge e le wena, le morwa wa gago, le morwedi wa gago, le molata wa gago wa monna le wa mosadi, le seruiwa sa gago, le modiiledi e a lego dikgorong tša geno. Ka gobane Morena, legodimo le lefase le lewatle, le tšohle tše di lego gona, o di dirile ka matšatši a seelago, mime a khutša ka tšatši la go šupa. Ke ka baka leo Morena a le šegofaditšego a le dira le lekgethwa.

Molao wa Bohlano

Hlompha tatago le mmago, gore o phele galelele nageng ye Morena Modimo wa gago a go fago yona.

Molao wa Boselela

O se ke wa bolaya.

Molao wa Bošupa

O se ke wa otswa.

Molao wa Seswai

O se ke wa utswa.

Molao wa Senyane

O se ke wa bolela bohlatse bja maaka go wa geno.

Molao wa Lesome

O se ke wa duma ntlo ya wa geno. O se ke wa duma mosadi wa wa geno, le molata wa gagwe wa monna le wa mosadi, le kgomo ya gagwe, le pokolo ya gagwe, le tšohle tše e lego tša wa geno.

Potšišo 93: Molao e lesome e arotšwe bjang?

Karabo: Ka matlapa a mabedi:^{a)} Mo letlapeng la pele re rutwa gore re itshware bjang mabapi le Modimo. Mo letlapeng la bobedi re rutwa seo e lego tshwanelo ya rena go batho ba bangwe.^{b)}

(a) Doit. 4:13; Eks. 34:28; Doit. 10:3,4; (b) Mat. 22:37-40.

Potšišo 94: Modimo o laelang mo molaong wa pele?

Karabo: O ntaela gore nna yo ke lego yo bohlokwa le poloko ya moya wa ka, ke swanetše go tlogela le go tšhaba go direla medimo e šele ka moka,^{a)} boloi, bonoge, tumelo e šele,^{b)} go rapela ba bakgethwa goba dibopiwa tše dingwe.^{c)} Mme ke swanetše go tseba Modimo wa nnete a nnoši gabotse,^{d)} mme ke tšhepe yena fela^{e)} mme ke ipee ka fase ga gagwe^{f)} fela ka boikokobetšo ka moka^{g)} le ka kgotlelelo; gore ke lebelele tšohle tše botse^{h)} gore di tlo tšwa go yena fela, gomme ke mo rate ka pelo ya ka ka moka,ⁱ⁾ ke mo tšhabe^{k)} le go mo hlompha,^{l)} ka mokgwa wa gore ke tlogele le go hlokomologa dibopiwa tšohle, e le gore le gatee ke se ke ka dira se se ganetšago thato ya gagwe.^{m)}

(a) I Joh. 5:21; I Bakor. 6:10; 10:7, 14; (b) Lev. 19:31; Doit. 18:9, 10; (c) Mat. 4:10; Kut. 19:10; 22:8,9; (d) Joh. 17:3; (e) Jer. 17:5,7; (f) Baheb. 10:36; Bakol. 1:11; Barom. 5:3,4; I Bakor. 10:10; Bafil. 2:14; (g) I Pet. 5:5; (h) Ps. 104:27; Jes. 45:7; Jak. 1:17; (i) Doit. 6:5; Mat. 22:37; (k) Doit. 6:2; Ps. 111:10; Diema 1:7; 9:10; Mat. 10:28; (l) Mat. 4:10; Doit. 10:20; (m) Mat. 5:29; 10:37; Dit. 5:29.

Potšišo 95: Na go direla medimo e šele ke eng?

Karabo: Go direla medimo e šele ke go tšhepa se sengwe goba seo ke inaganelago sona mmogo le Modimo goba sebakeng sa Modimo wa nnete a nnoši yo a ikutullotšego Lentšung la gagwe.^{a)}

(a) Baef. 5:5; I Dikoron. 16:26; Bafil. 3:19; Bagal. 4:8; Baef. 2:12; I Joh. 2:23; 2 Joh. 9; Joh. 5:23.

SONTAGA SA 35

Potšišo 96: Modimo o nyaka eng ka molao wa bobedi?

Karabo: O nyaka gore re se ke ra leka go swantšha Modimo ka mokgwa ofe goba ofe,^{a)} gomme gape re se ke ra leka go mo direla ka mokgwa o mongwe kantle ga mokgwa goba tsela yeo yena a e laetšego Lentšung la gagwe.^{b)}

(a) Jes. 40:18, 19, 25; Doit. 4:15,16; Barom. 1:23; Dit. 17:29; (b) I Sam. 15:23; Doit. 12:30; Mat. 15:9.

Potšišo 97: Na ga re a swanela go dira diswantšho?

Karabo: E, dibopiwa tšona di ka swantšhwa, eupša Modimo o re ganetša go dira diswantšho tša dibopiwa le ge e le go ba le tšona ka morero wa go di hlompha goba go mo direla ka tšona.^{a)} Ge e le Modimo yena, ga a swanela e bile ga go kgonege go dira seswantšho sa gagwe.^{b)}

(a) Eks. 34:17; 23:24; 34:13; Num. 33:52; (b) Jes. 40:25.

Potšišo 98: Na re ka dumelela diswantšho ka mo dikerekeng gore e be dipuku tša bao e lego ditho fela gore ba ithute ka tšona naa?

Karabo: Aowa, gobane ga re a swanela go ba ba bohlae go phala Modimo, eo a ratago go ruta bakriste ba gagwe e sego ka diswantšho tše di sa bolelego,^{a)} eupša ka kgašo ye e phelago ya Lentšu la gagwe.^{b)}

(a) Jer. 10:8; Hab. 2:18, 19. (b) Barom. 10:14,15,17; 2 Pet. 1:19; 2 Tim. 3:16,17.

SONTAGA SA 36

Potšišo 99: Molao wa boraro o nyaka eng?

Karabo: Gore re se ke ra nyefola goba ra šomiša leina la Modimo mo go sa swanelago ka go rogana^{a)} goba go ikana ka maaka^{b)} goba ka go ikana mo go sa swanelago.^{c)} Re se ke ra ba le kabelo dibeng tša mohuta woo^{d)} tšeo di šiišago ka go homola ge yo mongwe a di dira goba ka go di dumelela. Eupša molao wo o nyaka gore re šomiše leina la Modimo le lekgethwa ka tšhabo le ka tlhompho fela^{e)} gore re tle re mmolele pele ga batho^{f)} re be re mmitše^{g)} ka mokgwa wo o swanetšego gomme a tumišwe ka mantšu a rena le ka mediro ya rena ka moka.^{h)}

(a) Lev. 24:15, 16; (b) Lev. 19:12; (c) Mat. 5:37; Jak. 5:12; (d) Lev. 5:1; Diema 29:24; (e) Jer. 4:2; Jes. 45:23; (f) Mat. 10:32; Barom. 10:9, 10; (g) Ps. 50:15; I Tim. 2:8; (h) Bakol. 3:17; Barom. 2:24; I Tim. 6:1.

Potšišo 100: Na ke sebe se segolo gakaalo, go tlontlolla, go ikana le go roga leina la Modimo, ka moo Modimo a ka galefelago bao ba sa thušego go thibela le go ganetša nyefolo ye, ka mo ba ka kgonago ka gona naa?

Karabo: E, ke nnete ke sebe se segolo,^{a)} gobane ga go sebe se sengwe se segolo seo se befedišago Modimo go feta sebe sa go nyefola leina la gagwe; ke ka baka leo a ilego a laela gore sebe se se bjalo se otlwe ka lehu.^{b)}

(a) Diema 29:24; Lev. 5:1. (b) Lev. 24:16.

SONTAGA SA 37

Potšišo 101: Na re ka ikana ka leina la Modimo ka mokgwa wo o mo kgahlago?

Karabo: E, ge mmušo o bolela gore balata ba wona ba dire bjalo, goba ka mokgwa o mongwe, ge go hlokega e be gore motho a tiiše therešo le potego ka keno, e le go tlotliša Modimo, le go hola batho ba bangwe. Gobane go ikana ka keno ye bjalo go theilwe mo lentšung la Modimo,^{a)} ke ka baka leo le bakgethwa ba Testamenteng e Tala le yona e Mpsha ba be ba diriša keno ye ka nnete.^{b)}

(a) Doit. 6:13; 10:20; Jes. 48:1; Baheb. 6:16. (b) Gen. 21:24; 31:53; Jos. 9:15; 1 Sam. 24:23; 2 Sam. 3:35; 1 Dikgoši 1:29; Barom. 1:9; 9:1; 2 Bakor. 1:23.

Potšišo 102: Na motho o na le tokelo ya go ka ikana ka bakgethwa goba ka dibopiwa tše dingwe?

Karabo: Aowa; gobane keno ya nnete e ra gore re tlo bitša Modimo ge re ikana gore yena e be hlatse ya nnete le motsebi wa dipelo a nnoši, gape le gona Modimo a ka nkotla ge ke ikana ka go fora.^{a)} Taba ye ke ilhompho yeo e ka se newego sebopiwa sefe goba sefe, gobane ga ya se swanela.^{b)}

(a) 2 Bakor. 1:23; Barom. 9:1. (b) Mat. 5:34-36; Jak. 5:12.

SONTAGA SA 38

Potšišo 103: Modimo o laelang mo molaong wa bone?

Karabo: Sa pele: o laela gore tirelo ya ka kerekeng goba modiro wa thero ya lentšu la Modimo le dikolo di swanetše go lotwa,^{a)} gape le gore nna kudu ka la sabatha, ke gore letšatši la khutšo, ke be le mafolofolo a go kopana le phuthego ya Modimo,^{b)} go kwa lentšu la Modimo,^{c)} go diriša disakramente,^{d)} go bitša Modimo Morena pepeneneng^{e)} le go tlišetša bahloki dimpho tša lerato tša bokriste.^{f)}

Sa bobedi: Ke gore nna matsatšing ohle a bophelo bja ka ke khutše mediro yohle ye mebe, mme ke dumelle gore Modimo a šome ka Moya wa gagwe ka mo go nna, ka go realo e be go thoma sabatha ye e sa felego gona mo bophelong bjo.^{a)}

(a) Tit. 1:5; 2 Tim. 3:14; 1 Bakor. 9:13,14; 2 Tim. 2:2; 3:15. (b) Ps. 40:9,10; 68:26; Dit. 2:42. (c) 1 Tim. 4:13; 1 Bakor. 14:29. (d) 1 Bakor. 11:33. (e) 1 Tim. 2:1; 1 Bakor. 14:16. (f) 1 Bakor. 16:2. (g) Jes. 66:23.

SONTAGA SA 39

Potšišo 104: Ka molao wa bohloano Modimo o nyakang?

Karabo: O laela gore ke bontšhe tlhompho yohle, lerato le potego go tate le mme le go bohle bao ba beilwego ka godimo ga ka; gape le gore ke ipee ka tlase ga dithuto tše botse le dikotlo tša bona ka go kwa ka tshwanelo,^{a)} gape le gore ke kgotlelele mafokodi a bona le go hlaelela ga bona,^{b)} gobane go kgahla Modimo go re buša ka letsogo la bona.^{c)}

(a) Baef. 6:1,2,5; Bakol. 3:18,20,22; Baef. 5:22; Diema 1:8; 4:1; 15:20; 20:20; Eks. 21:17; Barom. 13:1. (b) Diema 23:22; Gen. 9:24; 1 Pet. 2:18. (c) Baef. 6:4,9; Bakol. 3:20; Barom. 13:2,3; Mat. 22:21.

SONTAGA SA 40

Potšišo 105: Modimo o nyakang ka molao wa boselela?

Karabo: Mo molaong wo Modimo o ntaela gore ke se ke ka bolaya motho yo mongwe goba go mo kweša bohloko, go mo hloya go mo tlontlolla ka mantšu, megopolo le ditiro tša ka gape le ge e ka ba ka mokgwa ofe goba ofe.^{a)} Gape o ntaela le gore ke lahle tefetšo tšohle,^{b)} gomme ke se ke ka ikwetša kotsing ka boomo.^{c)} Ke ka baka leo mmušo le ona o swerego lerumo la go thibela polayano.^{d)}

(a) Mat. 5:21,22; 26:52; Gen. 9:6. (b) Baef. 4:26; Barom. 12:19; Mat. 5:25; 18:35. (c) Barom. 13:14; Bakol. 2:23; Mat. 4:7. (d) Gen. 9:6; Eks. 21:14; Mat. 26:52; Barom. 13:4.

Potšišo 106: Eupša go bonala eka molao wo o bolela fela ka polao?

Karabo: Ka go ganetša polao ye, Modimo o re ruta le gona gore le ona modu wa polao e lego tseba,^{a)} lehloyo,^{b)} kgalefo^{c)} tefetšo le tše dingwe tše bjalo, o a di hloya a di tšea gore le tšona ke polao.^{d)}

(a) Diema 14:30; Barom. 1:29. (b) 1 Joh. 2:11. (c) Jak. 1:20; Bagal. 5:19-21. (d) 1 Joh. 3:15.

Potšišo 107: Na e ka ba go lekane go no re: re se ke ra bolaya motho yo mongwe, bjalo ka ge go šetše go boletšwe?

Karabo: Aowa; gobane bjalo ka ge Modimo a šupile gore o ganetša tseba le lehloyo le kgalefo, o laela gape gore re rate motho yo mongwe bjalo ka ge re ithata.^{a)} Re be re bontšhe batho ba bangwe kgotlelelo, khutšo, bopelonolo, kgaugelo le setswalle sohle.^{b)} Re swanetše go thibela tše e ka bago tshenyagalelo go bona ka mokgwa wo re ka kgonago ka gona.^{c)} Le manaba a rena re swanetše go a dira gabotse.^{d)}

(a) Mat. 22:39; 7:12; Barom. 12:10. (b) Baef. 4:2; Bagal. 6:1,2; Mat. 5:4; Barom. 12:18; Luk. 6:36; Mat. 5:7; 1 Pet. 3:8; Bakol. 3:12; (c) Eks. 23:5. (d) Mat. 5:44,45; Barom. 12:20.

SONTAGA SA 41:

Potšišo 108: Na mola o wa bošupa o re ruta eng?

Karabo: O re ruta gore makgapha ohle a rogakilwe ke Modimo ^{a)} mme ka baka leo rena ka pelo tša rena ka moka re be manaba a makgapha ohle,^{b)} re phele ka tlhweko le boitshwaro ^{c)} le ge e le mo boemong bjo bokgethwa bja lenyalo goba ka ntle ga lona.^{d)}

(a) Lev. 18:28. (b) Juda 23. (c) 1 Bathes. 4:3-5. (d) Baheb. 13:4; 1 Bakor. 7:7.

Potšišo 109: Na mo molaong wo Modimo ga a ganetše tše di fetago bootswa le tše dingwe tše di lešang dihlong tše bjalo naa?

Karabo: Ka ge mebele ya rena le meoya ya rena e le ditempele tša Moya o Mokgethwa, ka baka leo Modimo o rata gore re di lote, gore ka bobedi ga tšona e be tše di hlwekilego le tše kgethwa. Ke ka baka leo a ganetšago ditiro, dika, mantšu,^{a)} megopolo, diphišego tša makgapha,^{b)} le tšohle tše dingwe tše di ka gogelago motho go di dira.^{c)}

(a) Baef. 5:3,4; 1 Bakor. 6:18,19. (b) Mat. 5:27,28. (c) Baef. 5:18; 1 Bakor. 15:33.

SONTAGA SA 42

Potšišo 110: Modimo o ganetšang mo molaong wa seswai?

Karabo: Modimo o ganetša bohodu ^{a)} le bohlokodi ^{b)} tše di otlwago ke mmušo. Eupša go feta fao tše di latelago le tšona o di bitša bohodu, e lego, mediro yohle ya bolotšana le maano ohle a mabe ao re a gopolago go amoga batho ba bangwe tša bona gore e be tša rena.^{c)} E ka ba go ba

amoga tšona ka kgapeletšo goba ka go ikgakantšha tše o ka rego seo re se dirago ke toko, bjalo ka kelo-boima ya bofora, kelo-botelele ya bofora, tekanyo ya bofora, diphahlo tša bofora,^{a)} tšhelete ya bofora, kgodišo e sa lokago ya poelo ^{a)} goba ka mokgwa wo mongwe le wo mongwe wo Modimo a o ganetšago. Go feta fao Modimo o genetša le megabaru ^{d)} ka moka le go diriša dimpho tša gagwe ka bošaedi le go di senya.^{e)}

(a) 1 Bakor. 6:10. (b) 1 Bakor. 5:10; Jes. 33:1. (c) Luk. 3:14; 1 Bathes. 4:6. (d) Diema 11:1; 16:11; Hesek. 45:9,10; Doit. 25:13. (e) Ps. 15:5; Luk. 6:35. (f) 1 Bakor. 6:10. (g) Diema 23:20,21; 21:20.

Potšišo 111: Bjale mo molaong wo wa seswai Modimo o go laelang?

Karabo: O ntaela gore tšohle tše molemo tša batho ba bangwe ke di tšwetše pele mo ke swanetšego le ka mo nka kgonago ka gona; mme ke ba dire ka mo le nna nka kganyogago gore ke dirwe ka gona,^{a)} le gore ke šome ka potego ke tle ke kgone go ka thuša bahloki.^{b)}

(a) Mat. 7:12. (b) Baef. 4:28.

SONTAGA SA 43

Potšišo 112: Molao wa senyane o nyakang?

Karabo: O nyaka gore ke se ke ka bolela bohlatse bja maaka go e mongwe,^{a)} ke se ke ka fetola mantšu a e mongwe,^{b)} ke se ke ka ba mophari ka bobo goba motlontloli, ^{c)} ke se ke ka phakiša go ahlola motho goba go mo ahlola pele ga ge a sekišwa, goba go thuša gore a ahlolwe ka tsela yeo^{d)} ke tlogele maaka le bofora ka moka,^{e)} bjalo ka mediro ya Diabolo ka noši, ge e se ge ke rata go ithweša bogale bjo bo tukago bja Modimo.^{f)}

Gape molao wo o nyaka gore ke rate therešo ke bolele therešo ke be ke hlatsele therešo pele ga kgoro ya tshoko ešita le medirong ye mengwe ka moka.^{g)} Go feta fao ke swanetše go šireletša le go tšwetša pele tlhomphe le leina le lebotse la motho yo mongwe ka maatla a ka ohle.^{h)}

(a) Diema 19:5,9; 21:28. (b) Ps. 15:3; 50:19,20. (c) Barom 1:30. (d) Mat. 7:1; Luk. 6:37. (e) Joh. 8:44. (f) Diema 12:22, 13:5. (g) 1 Bakor. 13:6; Baef. 4:25. (h) 1 Pet. 4:8.

SONTAGA SA 44:

Potšišo 113: Na molao wa lesome o nyakang mo go rena?

Karabo: O nyaka gore mo dipelong tša rena go se ke gwa ba le kganyogo le ye nnyane goba mogopolo o mongwe wo o ganetšago molao wa Modimo, eupša re be manaba a sebe ka pelo tša rena tšohle re be re rate toko yohle.^{a)}

(a) Barom. 7:7

Potšišo 114: Na bao ba sokologetšego go Modimo ba ka phetha molao wo ka botlalo?

Karabo: Aowa, gobane le ba bakgethwa-kgethwa ba no ba le mathomonyana fela a go kwa molao wo ge ba sa le mo bophelong bjo^{a)}, eupša ka maikemišetšo a tiilego, ba thomile go phela go ya ka melao yohle ya Modimo e sego ka ye mengwe fela^{b)}.

(a) 1 Joh. 1:8; Barom. 7:14,15; Mmol. 7:20; 1 Bakor. 13:9. (b) Barom. 7:22; Ps. 1:2.

Potšišo 115: Ke ka baka lang ge Modimo a laela gore melao ye lesome ye e tsebagatšwe ka maatla a makaalo go rena mola bophelong bjo go se le o tee yo a kago go e phetha?

Karabo: Sa pele ke gore o rata gore bophelong bja rena bjohle re tsebe tlhago ya rena ya sebe le go e tsebišiša ge re ntše re phela,^{a)} e le gore re tle re be le tlhologelo ya go nyaka tebalelo ya dibe le toko mo go Kriste.^{b)} Sa bobedi ke gore re se ke ra lapa go ithaopa le go rapela Modimo gore a re nee kgaugelo ya Moya o Mokgethwa gore re tle re fele re mpshafaletšwa seswantšhong sa Modimo go fihla ge re fihlelela botlalo bjo bo re emetšego ka morago ga bophelo bjo.^{c)}

(a) Barom. 3:20; 1 Joh. 1:9; Ps. 32:5. (b) Mat. 5:6; Barom. 7:24,25. (c) 1 Bakor. 9:24; Bafil. 3:12-24.

THAPELO

SONTAGA SA 45

Potšišo 116: Ke ka baka lang thapelo e hlokega go bakriste?

Karabo: Ke ka baka la gore thapelo ke seripa se segolo sa tebogo yeo Modimo a e nyakago go rena,^{a)} le gore gape Modimo o rata go nea kgaugelo ya gagawe le Moya o Mokgethwa go bao fela ba sa kgaotšego go di kgopela go yena ka thapelo ya tlhologelo e kgolo le go di lebogela.^{b)}

(a) Ps. 50:14. (b) Mat. 7:7; Luk. 11:9,13; 1 Bathes. 5:17.

Potšišo 117: Na re swanetše go rapela bjang gore re kgahliše Modimo a tle a kwe thapelo ya rena?

Karabo: Sa pele ke gore re swanetše go bitša ka pelo yohle ^{a)} Modimo wa nnete a nnoši eo a ikutulletšego go rena lentšung la gagwe, ^{b)} re kgopele tšohle tšeo a re laetšeng gore re ka di kgopela ka thapelo. ^{c)}

Sa bobedi ke gore re tsebe bohloki le bomadimabe bja rena ka botlalo ^{d)} e le gore re tle re kgone go ikokobetša pele ga borena bja gagwe. ^{e)}

Sa boraro ke gore re na le therešo ye e tiilego ^{f)} ya gore, ka nnete Modimo o rata go kwa thapelo tša rena ka baka la Morena Jesu Kriste ^{g)} bjalo ka ge a re holofeditše mo lentšung la gagwe le ge re tseba gore ga re a swanelwa. ^{h)}

(a) Joh. 4:24; Ps. 145:18. (b) Kut. 19:10; Joh. 4:22-24. (c) Barom. 8:26; 1 Joh. 5:14; Jak. 1:5. (d) 2 Dikor. 20:12. (e) Ps. 2:11; 34:18; Jes. 66:2. (f) Barom. 10:14; Jak. 1:6. (g) Joh. 14:13; 16:23; Dan. 9:18. (h) Mat. 7:8; Ps. 27:8.

Potšišo 118: Na Modimo o re laetše gore re kgopele eng go yena ka thapelo?

Karabo: Tšohle tše re di hlokago e ka ba tša nama le tša moya ^{a)} tšeo Morena Jesu a di akareditšego thapelong yeo yena ka boyena a re rutilego yona.

(a) Jak. 1:17; Mat. 6:33.

Potšišo 119: Thapelo yeo e reng?

Karabo: E re: *Tata wešo wa magodimong,*

1. *leina la gago a le kgethwe;*
2. *mmušo wa gago a o tle;*
3. *thato ya gago a e dirwe lefaseng bjalo ka ge e dirwa legodimong.*
4. *O re fe lehono bogobe bja rena bja ka mehla;*
5. *o re lebalele melato ya rena bjalo ka ge re lebalela ba ba nago le melato go rena;*
6. *o se re iše molekong, eupša o re phološe bobeng.*

Gobane mmušo ke wa gago le maatla le letago ka go sa felego. Amene. ^{a)}

(a) Mat. 6:9-13; Luk. 11:2-4.

SONTAGA SA 46

Potšišo 120: Ke ka baka lang ge Kriste a re laetše gore ge re bitša Modimo, re re: *Tatawešo?*

Karabo: Ke ka baka la gore mathomong a thapelo ya rena a tsoše ka pela-pela ka go rena tšhabo ya bongwana le kholofelo go Modimo. Ke ona motheo wa thapelo ya rena ka gobane Modimo e bile Tatago rena ka baka la Kriste. Modimo o rata kudu go re fa dilo tšeo re di rapelelago go yena ka tumelo ya nnete, go feta ka mo botata wešo ba ratago go re fa tša lefase ka gona.^{a)}

(a) Mat. 7:9-11; Luk. 11:11-13.

Potšišo 121: Ke ka baka lang ge go oketšwa go “Tatawešo” ka go re: *yo a lego legodimong?*

Karabo: Ke gore re se ke ra ba ra gopolela bogoši bja legodimong bja Modimo bjalo ka ge e ka ke bja lefase,^{a)} le gore re ka lebelela tšohle tšeo di hlokwago ke nama le moya maatleng a gagwe ka moka.^{b)}

(a) Jer. 23:23,24; Dit. 17:24,25,27. (b) Barom. 10:12.

SONTAGA SA 47

Potšišo 122: Thapelo ya pele e reng?

Karabo: *Leina la gago a le kgethwe.* Ke gore: sa pele, re nee go go tseba gabotse.^{a)} Re go kgethe, re go rete le go go tumiša medirong ya gago yohle yeo go yona go bonalago gabotse maatla ka moka, bohlae, botho, toko, kgaugelo, therešo tša gago.^{b)} Le gore re thee bophelo bja rena ka moka, megopola, mantšu le mediro ye rena gore leina la gago le se ke la nyefolwa ka baka la rena, eupša le hlompfiwe le go retwa.^{c)}

(a) Joh. 17:3; Jer. 9:24; 31:33,34; Mat. 16:17; Jak. 1:5; Ps. 119:105. (b) Ps. 119:137; Luk. 1:46,47,68,69; Barom. 11:33. (c) Ps. 71:8; 115:1.

SONTAGA SA 48

Potšišo 123: Thapelo ya bobedi e reng?

Karabo: *Mmušo wa gago a o tle.*

Ke gore: Re buše ka lentšu le ka Moya wa gago e le gore ka go realo re tle re kgone go ipea ka tlase ga gago ka mehla yohle;^{a)} o boloke le go

atiša kereke ya gago;^{b)} o fediše maatla a diabolō le maatla ohle ao a ikgodišago kgahlanong le wena, gape le go fediša maano-mabe ao a naganwago kgahlanong le lentšu la gago le lekgethwa,^{c)} go fihlela ge botlalo bja mmušo wa gago bo etla,^{d)} mo wena o tlogo go ba tšohle go bohle.^{e)}

(a)Ps. 143:10; 119:5; Mat. 6:33. (b) Ps. 51:18; 122:6. (c) 1 Joh. 3:8; Barom. 16:20. (d) Kut. 22:20; Barom. 8:22,23. (e) 1 Bakor. 15:28.

SONTAGA SA 49

Potšišo 124: Thapelo ya boraro e reng?

Karabo: Thato ya gago a e dirwe lefaseng bjalo ka ge e dirwa legodimong.

Ke gore re nee le batho bohle gore re tlogele thato ya rena,^{a)} le gore re ipee ka tlase ga thato ya gago ka ntle ga pelaelo, thato yeo e lego yona e lokilego e nnoši,^{b)} gore mang le mang a sware le go tšwetša pele maemo le mošomo wa gagwe ka bolokologi le ka potego^{c)} bjalo ka ge go dira barongwa legodimong.^{d)}

(a) Mat. 16:24; Titus 2:11,12. (b) Luk. 22:42; Baef. 5:10; Barom. 12:2. (c) 1 Bakor. 7:24. (d) Ps. 103:20,21.

SONTAGA SA 50

Potšišo 125: Thapelo ya bone e reng?

Karabo: O re fe lehono bogobe bja rena bja ka mehla.

Ke gore: a nke o re nee tše di nyakwago ke mmele,^{a)} e le gore ka go realo re tle re lemoge gore wena o tlogo o le noši ya tšohle tše botsel^{b)} le gore boitapišo bja rena le mešomo ya rena, le dimpho tša gago, ka ntle ga tšhegofatšo ya gago di ka se re hole selo,^{c)} le gore gape re tloše kholofelo ya rena go dibopiwa tšohle mme re e bee go wena fela.^{d)}

(a) Ps. 145:15; 104:27; Mat. 6:26. (b) Jak. 1:17; Dit. 14:17; 17:27. (c) 1 Bakor. 15:58; Doit. 8:3; Ps. 37:16; 127:1-2. (d) Ps. 55:22; 62:10; 146:3; Jer. 17:5,7.

SONTAGA SA 51

Potšišo 126: Thapelo ya bohllano e reng?

Karabo: O re le balele melato ya rena bjalo ka ge re le balela ba ba nago le melato go rena.

Ke gore: Rena badiradibe ba šokišago, a nke o re lebalele melato ya rena yohle le bobbe ka moka bjo bo re kgorametšego ka baka lamadi a Kriste,^{a)} bjalo ka ge re na le bohlatse bja kguagelo ya gago, e le gore maikemišetšo a rena ohle ke gore re lebalele batho ba bangwe ka pelo yohle.^{b)}

(a) Ps. 51:1; Ps. 143:2; 1 Joh. 2:1; Barom. 8:1. (b) Mat. 6:14.

SONTAGA ŠA 52

Potšišo 127: Thapelo ya boselela e reng?

Karabo: O se re iše molekong, eupša o re phološe bobeng.

Ke gore: ka ge re le ba fokolago ka mo go sego le motsotso o tee o re ka ikemelang ka ona,^{a)} le gore gape manaba a rena, diabolob,^{b)} lefase,^{c)} le yona nama ya rena,^{d)} ga di kgaotše go re hlorigša, a nke o re emiše le go re tiiša ka maatla a Moya o Mokgethwa, e le gore re se ke ra hwa mo ntweng ye ya moya,^{e)} eupša re itwele ka maatla, go fihlela mafefelong ge re fenya ka go sa felego.^{f)}

(a) Joh. 15:5; Ps. 103:14. (b) 1 Pet. 5:8; Baef. 6:12. (c) Joh. 15:19. (d) Barom. 7:23; Bagal. 5:17. (e) Mat. 26:41; Mar. 13:33. (f) 1 Bathes. 3:13; 5:23.

Potšišo 128: Na o feleletša bjang thapelo ya gago?

Karabo: Gobane mmušo ke wa gago, le maatla, le letago ka go sa felego.

Ke gore: tšohle tše, re di kgopela go wena ka gobane wena o kgoši ya rena ye e nago le maatla dilong ka moka, o na le thato le maatla a go re nea tšohle tše botse,^{a)} e le gore ka tšeo tšohle, leina la gago le lekgethwa le tumišwe ka go sa felego, e sego rena.^{b)}

(a) Barom. 10:12; 2 Pet. 2:9. (b) Joh. 14:13; Jer. 33:8,9; Ps. 115:1.

Potšišo 129: Lentsu le Amene le bolela eng?

Karabo: Amene ke gore: E tlo ba nnete le tiišetšo. Gobane ka kgonthe thapelo ya ka e kwelwe ke Modimo go feta ka mo ke e kwelego ka gona ka pelong ya ka gore ke hlologetšwe tšeo ke di kgopetšego go yena.^(a)

(a) 2 Bakor. 1:20; 2 Tim. 2:13.